

KANA LESA WAKYALULAPO

MILANGULUKO YANJI

PA KYAMBO KYANJI?



Twayai tukunyiike mitwe yetu panshi. Mutemwe Nkambo Yesu, atweba twapwila pamo jibiji mu Jizhina Jenu, na luketekelo lukatampe lwa kwitulwilwa kwa Bulume bwakusangululwa bwakwa Lesa mukwituleta mba tutuluke kifulo kyetu ne mpuzha yetu, kabiji ne mwingilo wetu, nobe boba bantu baitwa, baabanwa kufuma ku ntanda, bepaana kwi Lesa. Kiswishai, Nkambo, bufuku buno, amba mapesho akwa Lesa ekale akwitutangijila ne kwitubuula mu bintu byotuba nangwa kwamba, amba kyakonsha kuleta munema ne lukumo ku Jizhina Jenu. Amena.

² Amiwa njibingi na lusekelo pa kubwela jibiji mu kipwilo bufuku buno kabiji ne kwikala ne anweba bantu batemwe. Kabiji Amiwa nayuka mba kwakaba, bino Amiwa naichiletu mukazhi wami, Amiwa naketekela mba ku manaite kokwa, naite-faivi nangwa naite-sikisi nangwa kintu kimo, kabiji akwa kwakaba bingi kukikala byokuji kuno. Nanchi Amiwa mbena kupilwa lubesha lwakyuya pano. Nanchi, Amiwa njibingi na lusekelo pa kwikala pano pa tambanako pa kino kimye kyawama kya Lusanguko.

³ Kabiji Amiwa kechi nakonsha kwamba mba Amiwa sakulomba lulekelo lwa mambo pabyambo byalepa ne, kulepa kwa Mbila lukeelo luno, bino Amiwa. . . Akyo kyajinga, Amiwa kechi nakebele—kukeba kupwisha butekanyi bwenu kabiji ne kwibubwelela jikwabo bufuku ne. Bino Amiwa—Amiwa nakebele ku—kuleta yoya Mbila kwi anweba, amba anweba mwi lubaji lwa lusanguko. Mwamona? Kabiji kechi mwakamwe Pakyokyo ne, ine kafwako, mwamona. Ikalai basangalala Pakyokyo! Kechi kujipo kintu kimo ne, kafwako nangwa kimo, kyakonsha kwimwabanya anweba kufuma ku Kikye ne; kafwako kanatu; bukikizhi bwa Peenape bwa mu Bufumu bwa Lesa. Kimye Lesa kyoabika shintampa wa Katetesho Kanji pe anweba, anweba kanatu ne ku mpelo ya lwendo.

⁴ Kimye kafulumende kyoabikapo aka katetesho pabipe, amwa mumukwakwa wangyangyi babikapo katetesho pakibelo, awa motoka kechi wafwainwa kulukukwa ne poso wafika akwa koabena kuya.

Inge Lesa wabika Katetesho Kanji pa muntu, kabiji aka

Katetesho ke Mupashi Wazhila, inge Aye wabikapo katetesho pa muntu uji byobya, waya ku lwendu lwanji lwa Peenape. Kechi kwaikalapo muyewa musango aye ne, kana wabwela byonkabyo jibiji, jikwabone. Mambo vulukai, Efisesa 4:30 waamba mba, “Kechi mumufichishe pa muchima Mupashi Wazhila wakwa Lesa ne, imo mo mwabikijilwe katetesho ka bimye byonse.” Mwamona, obewa wabikwa katetesho myaka ne myaka. Obewa wabikwa katetesho, Peenape, mu Bufumu bwakwa Lesa, konka ku Mupashi Wazhila. Pano langulukai kyokyo!

⁵ Nanchi, obewa, diabola ukakupuma obewa, kabiji aye ukamba byavula pe obewa, ne kupa mambo obewa, kabiji—kabiji ne kweseka ku kulengela obewa kulanguluka mba kechi byo uji ne. Bino kechi wakonsha ku muteleka aye ne.

⁶ Pano, mwayuka mba obewa wapitaila kufuma kulufu kuya ku Bumi. Mwayukatu anweba bintu byomwatemenwe, anweba kechi mwibitemwa ne jibiji. Anweba mwayukatu mba mwaketekela kyonsetu kyambo kya Lesa. Anweba mwamona Lesa byoabena kwingila mukachi ketu, kwakubula... Kushinikisha kwakiine amba Aye ye mukatampe “AMIWA NJIPO.” Anweba mwamona mba abya byoamba byonsetu Mujizhina Janji, kafwako nangwa kimo kyobaawilepo Mujizhina Janji bino byonsetu bimwekanyika byonka byokyaambiwa kubiwa. Nangwatu ku sayansi, mapepala abyambo, kipikichala, makamela, banembeshi, nebintu bikwabotu, byatulukile kyokya. Mwamona, nangwatu abo bakebelenga nangwa ne, Lesa wibalenga abo kwikyuba kyo, mwamona, mukulenga amba kiyukanyikwe.

⁷ Pano, byojiji jibumba jicheche. Vulukai, kechi ke jibumba jikatampe Aye joeyako ne. “Kuchina ne, anweba kajitanga kacheche; kyo kyaswa muchima wa Shenu...” Mwamona?

⁸ Amiwa nasaka nemushile kyambo anweba, kyakwimukumisha, kasa tukyangye kutenteka maboko wa mwingilo. Kabiji akye kyakwimukumisha bingi, bino anweba mwafwainwatu kwikiyuka. Pano, nanch Amiwa kechi nakwambanga namba kepamotu nayoya nambala, bino Amiwa kechi nakukeba amba anweba mushale nakyone.

⁹ Amiwa kechi nayuka ne kana bantu baji muno bayuka kumvwangakanya lusemo lwa bang’ombe. Akyo, Amiwa kechi naketekela mu kikyene ne, bino Amiwa ne kimona kyaubiwa. Kabiji Amiwa nebamona abo basenda malume a mulume, ke byavulatu, abyo byafwainwa kukwatwa pacheche kukyela, nobe kakichi kakacheche kamujino, kabiji ne kwikala byobya nobe kakibese kakosa. Kabiji nekwalula aamangalasi abayisha kintu, Amiwa kechi nayuka kana bimye binga, poso amba malume... Apo obewa powafwainwatu kubula kumona na meeso obetu akusemwa nao, onka mangalasisu. Bino kimye kya kwikibaisha, andulendi nangwatu andulendi kabiji bimye fifite, obewa

wankosha kumona monka mukusumisha jimo pachechetu, aa malume, kampe fifite andulendi kacheche kakishi ka bumi abwela azhokoloka. Kabiji, mu mwanamukazhi muji make avula afumamo, mu—mu malume. Pano, kimye byonse apo—apo pobiletwa pamo, pano, kintashi abye bibiji bisambakana ne kunungankanya...

¹⁰ Pajitu umo kufuma mu yewa milyoni ukekala na bumi. Bushe anweba mwakilangulukapo pa kyokyo nyi? Ke kakishi kabumi kamotu, kabiji ne jike jinka jimo, bonse babiji bajitu pamo, bino kujitu umo ukekala na bumi. Kabiji kipo kechi kiji namambo akubamba wepi umo wimbapo pamo pantashi ne. Mambo, kimye kimo jike, kunyuma kwine, kabiji kakishi kabumi kakonsha kwikala pakachi ka malume, kabiji byonsetu biya peulu yakikwabo. Kisenda Maana a kuyuka kana usakwikala nsongwalume nangwa nsongwakazhi, mutwe-wachiluluka, mutwe-wafituluka, nangwa kya musango-mukwabo. Ke kusalululwa kwa Lesa. Kechi kwakonsha kwikala kintu kikwabo ne. Kusalulula!

¹¹ Nangwatu mu kusemwa kwa ku mubiji, ke kusalulula, kana usakwikala nsongwalume nangwa nsongwakazhi, nangwa musango yense mo kyaikela. Kabiji kimye aka kakishi kabumi kakacheche pokebila amwa mukajike kakacheche, kabiji nekamukila kakacheche kafumako, kitula ke kamwana kalukeke amwa mumukubi pajiponsetu; nyama, mwaana, nangwa kijikyonsetu. Kabiji aa onsetu mamilyoni atwishi twabumi... Aa mamilyoni amake, mamilyoni atwishi twabumi, kabiji umo wikalatu nabumi. Byonse pamotu, bino Lesa usala monka mukusalululwa kwabintu abyo bikekala na bumi, kabiji ne byonse byashala bibena kufwa. Umotu kufuma mu milyoni!

¹² Kimye Isalela kyo afumine mu Ijipita, bonse baketekejile mu mbila ya ngauzhi umo. Abo bamwene biyukilo bya Lesa, ne Mosesa. Bonsetu mwi abo bamwene. Kabiji abo bonsetu pamo bafumine mu Ijipita, ne kwabuka Kalunga Kachila, kabiji babatizhiwe kwi Mosesa. Umo nemukwabo bamwene bulume bwa Lesa kasa bupuma aye, kimye aye kyoaimbile mu Mupashi; kabiji kimye Milyama waimbile musankayi, wanyema peulu-nepanshi yatente. Umo nemukwabo, kila bufuku, bajilenga nyama, manna a mwiulu afuminenga mulwelele. Bonse batomenenga kufuma ku joja Jibwe ja bumupashi ajo japuminweko. Kabiji akwa kwajinga bantu tuu milyoni balupukile mu Ijipita. Kana banga bakonsheshe kutwela muntanda yamulaye? Babiji. Umotu kufuma mu milyoni! Nga bonse bajinga pi? Yesu waambile mba bonse baipaiwe. “Bashakulu benu bajilenga maana mungyetu, pa myaka sate, kabiji Amiwa naamba kwi anweba mba bonse bafwale.”

¹³ Pano kuji pepi nobe Benakilishitu faivi anduleendi milyoni pa ntanda bufuku buno, kubelenga ba Katolika, Polotesitati, ne bonsetu. Inge Yesu wafwainwa kwiya mukokwa Kushikulwa,

mwaila abyo Amiwa byo naamba, kwakonsha kwikala faivi andulendi bakushalapo muntanda bufuku buno, monka mu Kushikulwa. Kabiji abo kiine pajuba ne juba, babelenga ntanda yonsetu, akyo kechi kyaletwapo mukubelengelwa ne. Nanchi kyakonsha kwikala kimye kiji kyonse, mwamona.

¹⁴ Oo, Benakilishitu, twayai tukwachishe bya nkondo bya Lesa. Twayai tube kyonse kyo twayuka, pa kumwingijila Aye, ne kumutemwa Aye, kabiji ne kupembelela kyokya kimye kikatampe.

¹⁵ Pano, kechi kukekalapo jibumba jikantampe kabiji ne mamilyoni akafumamo mukino kisemi ne kabiji nekulupukamo. Akwa—akwa kechi kwakonsha kwikala ne.

Pano, vulukukai, kila juba jibena kuya kumpelo yakino kisemi, kila juba. “Byonka byo kyajinga mu moba akwa Nowa, nanchi byobyo kikekala ne pakwiya kwa Mwaana muntu, amo myeo eiti mo yapulukile ku meema.” Bino kila juba jipwisha kimye kya myaka-foote ya muntu umo, pa bamo. Mwamona? Kabiji kila juba, bavula bakabikwa katetesho ka mu Bufumu. Juba jimo, juba japelako jikamweka.

Twayai twikale bashininwa ponka pano, kimye atweba kyo tuji mu milanguluko yetu yawama. Kabiji ne mu kipwilo, kabiji ne mukachi ka bantu, amo Mupashi Wazhila nanchi moemwesa Ayemwine ne atweba, twayai tumone mba bintu byonse bijitu bulongo, kabiji ne kwikalatu bulongo, kumeso Anji.

¹⁶ Kechi anweba muleke ne. Kechi anweba mwafwainwa kukokoloka ne, mute ne bufuku, poso abwa Bulume bwakusangulula Bwimufumya ku bintu bya muntanda, ne kuya mu Bufumu bwa Lesa. Kabiji anweba kine mwaletwa mu Bufumu bwa Lesa kabiji ne kusangululwa na Mupashi wa Lesa, njibingi na lusekelo! Nena mipolo ya lusekelo atweba twafwainwa kwikala pa manungo etu, mute ne bufuku, na kusachila Lesa pa byo auba Aye.

¹⁷ Bufuku buno tuji na lupipu lucheche mu mpwijilo. Tuji na mulongo wawama kuno, Mulongo Capps. Aye waishile kwi atweba kufuma ku kipwilo kya Nazarene. Kabiji Amiwa nalanguluka mba abyo ibyo, Mulongo Capps? Aye bufuku buno wakebewa kutentekewa maboko ne atweba, mukubika maboko atu.

¹⁸ Atweba kechi tuji na bipepala bya kupana ku uji yense ne, nangwa byonkabyo atweba twayuka mba byo... Atweba twakukonsha kwikala na bipepala, bino atweba twaketekela mba kya kiine, kutenteka wamwingilo, aye bipepala byanji biji Mwiulu. Mwamona? Kabiji aye—aye uji na nsambu ya kusapwila Baibolo kikulutu Lesa wimwesa bumi bwanji na Baibolo. Atweba twaketekela mba ato to tuyukilo twanji.

¹⁹ Kabiji, pano, Mulongo Capps watentekwa mukwikajikwa kubantu bonse muno mu—mu kipwilo kya Nazarene, bino

bufuku buno aye ubena kukebewa bakulumpe, kabiji ne bakwabotu, mukubika maboko abo pe aye mukumutenteka, mu kusenda iye Mbila. Ke kintu kyakonsa bingi!

²⁰ Amiwa na—Amiwa naumvwa masawakya kufuma apo Amiwa najinga ku Tucson, kabiji masawakya awama bingi, ya Mulongo Capps yabukwasho bwanji bwawama bwakukwasha Mulongo wawama Neville, ao wakwachijila aka kandulu ka Kyeya nobe byonka byakosa abe babilobo babiji bakwachijila. Atweba twatenteka maboko pa Mulongo Neville, bino kechi pa Mulongo Capps ne. Kabiji Amiwa nakeba aba bamingilo, Mulongo Jackson ne bakwabo, inge bakwabo baji muno, kabiji ne Mulongo Ruddell ne bakulumpe ba kipwilo kuno, inge abo bakonsha kwiya kuno pa mamineti acheche pano, kabiji ne kubika maboko pa Mulongo Capps. Kabiji ne . . .

²¹ Pano atweba twatana kuuba mba, mu Baibolo, abyo abyo byo baubile abo mujishinda jimotu, abo batentekele maboko abo pe abo ne kwibatuma. Kabiji abyo ibyo byo baubile ne Timoti. Waambile mba, “Mwaila kikye kya bupe kiji mwi obewa, kufuma ku bankambo babakazhi ba Lois . . .” Abo bekimwene akya, amba muyiwe muntu mwajinga kyabupe, kyaiya pe aye kupichila mu booba bakulumpe, pa kubika maboko pe aye.

²² Pano, mujuba-jakulutwe batemwe, mujuba-jakulutwe-mvula batemwe, yajinga, monka, mukuvwangakana. Abo balangulukile mba bamupele kya bupe, pa kuuba kyokyo. Ine, akya kya bupe kyajinga kala mwi aye, kabiji abo babikiletu maboko abo pe aye mukwikajika amba abo baketekela amba Lesa wabika kala kya bupe mwi aye. Kabiji abo be kikajikile, mu kubikapo maboko.

²³ Kabiji baabo banabalume baji muno mu kipwilo, akyo Amiwa naketekela mba baji nakyoko mu mweo yabo na Bulume Bwanji bwa kusangululwa; inge anweba balongo mwakonsha kwiya ponka pano, Mulongo Ruddell kabiji ne anweba bonse muji muno mu kipwilo, kabiji ne bakulumpe ne bipwilo biji pepi bituzhokoloka, beye babikepo maboko pa Mulongo Capps, pakumba mba atentekele namambo akumwikajika, ku meso ajije jibumba, kabiji baatumwa na kusapwila Mamboawama akwa Nkambo Yesu, konse Lesa koakonsha kumwita aye. Aye waikala . . .

Aye waikala kala umo wa mwi atweba, mwaila Kusemwa. Aye ke umo mwi atweba mambo aye waketekela ino Mbila. Aye ke umo wa mwiatweba mambo akuuba mba—mba aye wimana kulubaji lwa Bukine bwa Kyambo. Kabiji atweba twakeba mba Mulongo Capps pano atentekele mukwikajikwa, kumeso enu, mu kubikiwapo kwa maboko, amba aye ke umo wamwi atweba.

Kyawama, Mulongo Ruddell, Mulongo Capps, Mulongo Neville. Mulongo Junior Jackson, ne bonse bamwingilo banji kuno, Amiwa kechi nayuka baanga baji muno ne. Amiwa

kechi. . . Amiwa naketekela baji na mpwijilo yabo bufuku buno. Nanchi iya ponka pano, Mulongo Capps.

Pano Mulongo Hunter ne bonse bafuma ku New York bajipi, Amiwa. . . Mulongo Anthony? Amiwa naketekela mba babwela jibiji. [Mulongo Neville waamba mba, “Kuji Mulongo Anthony kunyuma kokwa.”—Waku.]

Kabiji anweba bakwabo muji muno, baji ne atweba, kika, atweba twakonsha kwikala balusekelo inge mwaiya kuno ne kwimana pamo ne atweba, nobe bonse twatuluka ne kuketela mba Mulongo Capps ke. . .

Baanga muno bayuka Mulongo Capps? Sutulai maboko enu. Kijitu bulongo, bikai maboko enu panshi. Baanga baketekela mba aye ye kalume wakwa Lesa? Sutulaiko maboko enu. Atweba twamutemwa aye, nobe mulongo wetu.

²⁴ Pano kino kechi ikyo kyotwakonsha atweba kutela mba kutenteka ne, bino Amiwa nakeba aje jibumba, Amiwa kechi nakonsha kwimba yiwe lwimbo ne, bino Amiwa nasaka namba anweba munkwasheko amiwa kumweseke.

²⁵ Aja juba jimo ngauzhi waile ku kitapisho, mu tempo. Kabiji kimye aye kyoajinga kokwa ku tempo. . . Aye wajinga muntu wawama, bino aye walajiletu pa maboko akwa Uziya mfumu, kabiji aye wajinga—aye wajinga muntu wawama. Bino nangwa byonkabyo, juba jimo, ku tempo, aye wamwenepo kintu kimo, byo aponene mu kimwesho, akyo aye kyoakyangye kumonapo kunyuma. Aye wamwene ba Malaika, na byapi, byakutumbukilako kunyuma ne kulutwe, kupita mu kishimikwa, kasa bajila mba, “Wazhila, wazhila, wazhila, Nkambo Lesa Wabulume bonse!” (Iya, mulongo. Ee. Mwamona?) “Wazhila, wazhila, wazhila, Nkambo Lesa Wabulume bonse!” (Ben.)

²⁶ Kabiji kimye aye kyoaubile kyokyo, kitulwapo kya mutempo kyafuminemo. Kabiji aye waambile mba, “Malwa amiwa! Mambo Amiwa ne muntu wa byatunwa byabula kutokeshiwa.” Mu Kyeenyi kya kwa Lesa aye watulukile, amba nangwatu ekale ngauzhi, aye wajinga mukilubo. Aye waambile mba, “Amiwa ne muntu wa byatunwa byabula kutokeshiwa, kabiji Amiwa naikala mukachi ka bantu baji na byatunwa byabula kutokeshiwa.”

²⁷ Kabiji umu wamu ba Malaika waishile, ne kutola jikala ja Mujilo ne kukwata mivumbo yanji, ne kwamba mba, “Aula, mwaana muntu!”

Mwakonsha kwitupa pa kusawila pa yewa, nyenga, inge wakonsha. Baanga bayuka yuwe lwimbo? Twayai, veeleshi umu. Kijitu bulongo.

Kimye jikala ja Mujilo jakwachile ngauzhi,

Kumulenga aye kwikala walumbuluka byonka
 byoakonsha kulumbuluka,
 Kimye Jiwi ja kwa Lesa byo jaambile mba,
 “Ing’anyi usakwitwendelako atweba?”
 Nanchi aye wakumbwile mba, “Amiwa Bano,
 tumai amiwa.”

[Kafwapo bijipo pa tepu ne—Waku.] . . . ambai,
 Nkambo yami,
 Ambai, kabiji Amiwa nsakuya bukiji na
 kupana mukumbu kwi Anweba;
 Ambai, Nkambo yami, ambai, Nkambo yami,
 Ambai, kabiji Amiwa kakumbula, “Nkambo,
 tumai amiwa.”

Mamilyoni baji mu bubu kabiji kya buvu
 babena kufwa,
 Uvwai kubulanda bwabo kabiji ne kujila
 kwabukaji;
 Iyai, mulongo, iya mwibapokolole;
 Bukiji bukiji kumbulai, “Nkambo, Amiwa
 bano.”

Ambai, Nkambo yami, ambai, Nkambo yami,
 Ambai, kabiji Amiwa nsakuya bukiji na
 kupana mukumbu kwi Anweba;
 Ambai, Nkambo yami, ambai, Nkambo yami,
 Ambai, kabiji Amiwa kakumbula, “Nkambo,
 tumai amiwa.”

Lekai bakulumpe beye pano ne kuzhokoloka kabiji babiike
 maboko pa Mulongo Capps. Twayai tukunyike mitwe yetu.

²⁸ Mutemwe Lesa, kutulwapo kyamu tempo pano kyatwalwa
 kala jikwabo, kabiji byo mubena kumona Mupashi wa
 kusangululwa Bumi kasa abena kwingila mu mulongo wetu.
 Amiwa nalomba, Lesa, nobe aye byo abena kumvwa bibye
 kufuma Mwiulu, kwamba mba aye wafwainwa kuya. Atweba
 twatenteka maboko pe aye, nobe bakulumpe Benu, Nkambo,
 kabiji ne kumupa kuboko kwa kilujo kwa lumvwang’ano
 lwabupopweshi; ne kubikapo maboko etu pe aye, kabiji ne
 kupana mapesho akwa Lesa pe aye, amba Anweba mumushinge
 maanyi pabyatunwa byanji, pa milanguluko yanji, kabiji ne
 bumuntu bwanji bonse. Kabiji lekai aye atwale ino Mbila ya
 mamboawama kumukoka yense kabiji ne makonka ana ao
 Anweba omwamwichila aye. Kiswishai kye, Nkambo. Atweba
 twapana kwi Anweba awe mulongo wetu, nobe kalume Wenu,
 mu Jizhina ja Yesu Kilishitu. Amena.

²⁹ “Sapwila Kyambo,” mulongo wami mwanjike. “Kikale
 mubyawama, nagwatu mubyatama; shinawina, kajipila,
 nakutekanya konse kabiji na Lufujishi lwetu.” Lesa akupeshe
 obewa, mulongo.

³⁰ [Mulongo Ben Bryant waamba mba, “Mulongo Branham, bushe mwakonsha kubika maboko pe amiwa nyi? Bakonsha kubika maboko pe amiwa nyi? Amiwa nakonsha kutemwa kutentekewa.”—Waku.] Bushe muji...? Amiwa kechi nayukile amba kewartentekewa ne.

Mulongo Ben, papo, waiya kwi atweba. Amiwa nalanguluka mba wasapwila pa bimye byavula. Nangwa byonkabyo, aye kechi wajinga na mwingilo waikajikwa ne (Amiwa nalangulukile mba wajinga nakyo; ao oene mambo Amiwa ona mwiichijile.) kumutenteka, nangwa kubikapo maboko pe aye pano.

³¹ Pano, mukazhi wakwa Mulongo Ben uji muno kuntu kumo, kabiji ke muntu mutemwe. Aye wajinga mwanamukazhi musapwishi. Kabiji aye ne mulongo wetu byo besongwele, kabiji wamuletele ku tambanako, byo amwene ne kumvwa Kyambo, nangwa byonkabyo inetu mucheche wajinga na bumuntu bwawama, bino aye byo amwene mba kyajinga kyatama banabakazhi kuuba kyokya, wibitujilepo aye; kabiji kyamwekele nobe kyauponena pa mulume wanji. Akyo kine. Abo ke butumwa. Abyo byo kyafwainwa kwikala.

³² Mulongo Ben utwala matepu, monka amo Amiwa nayukila, na bakazhi banji. Abo abaya monka mu...kufuma-mo-monka mubifulo, kubwela kumitumba, kuya mungye, kabiji abo bateleka ku matepu kabiji ne kwambambapo pa matepu. Bimye byavulula abo bebanyematu, bebapangatu, bebatayatatu. Atweba twaketela kyokyo. “Mambo bonse aba bekala bwikalo bwaoloka mwi Kilishitu Yesu bakamanyikwa.”

³³ Baanga muno bayuka Mulongo Ben? Baanga baketekela mba aye ye kalume wakwa Lesa, wafikilamo mu ao mapesho o twaipuzha kwi Lesa pe aye? Mwamona, aye kechi mwenyi ne. Aye wajinga ne atweba pa myaka yavula ne myaka. Amiwa namuyuka aye nobe muntu wikepesha. Aye ujitu pamo ne amiwa; aye uba bilubo byavula bingi. Atweba bonse tuuba byoabyo. Kyonatemwa Amiwa pe Mulongo Ben, aye winengezha kufukama ku manungo anji pakuuba mba ekyube bulongo.

Kabiji aye byo aumvwine, juba jikwabo, pa *Masongola Ne Kwikana*, aye ne mukazhanji bajinga benengezha kwabana, mambo aye ye atemwa, kabiji naye wamutemwa, bino bakeba kulondela na Kyambo kya Lesa. Kyonse kyaamba Kyambo, akyo ikyo abo kyobakebelenga. Amiwa nalomba mba Lesa apesha Ben ne mukazhi pamo, mu mwingilo Wanji.

Twayai tubike maboko etu pa mulongo wetu.

³⁴ Lesa Mutemwe, atweba twatenteka maboko etu pa Mulongo wetu Ben, na kiyukilo kyo twamutemwa aye. Kabiji atweba twaketekela, Nkambo, amba aye ubena kuswa kwingila mwingilo Wenu Anweba, pakuuba mba atumwe na ao matepu, mukujizha mukachi ka bantu bakumitumba monka mumashinda abo mobekala ako atweba bavula kechi twakonsha

kufikako ne, bino nangwa byonkabyo Mbila yafwainwa kuya ku ntanda yonse. Atweba twalomba mba Anweba musa kupesha mulongo wetu, kabiji ne kumupa Mupashi Wenu, kabiji Aye afike pe aye. Kabiji mutangijilai aye, kabiji mutwalai aye nemukazhi wanji kubyobya bifulo ako kampe nangwa mweo umo ukalupukamo, kabiji bizhilo kechi byakoshenka kushikinka ne poso umo mukoko watwela monka. Anweba kechi mwatondwa na naite naini ne. Aye... Jizhina jonse jiji mu Buuku jafwainwa kuletwamo. Bakwashai, Nkambo, abyo atweba byotubena kubika maboko pe aye, byo tubena ku kwatakanya ne atweba byonka nobe mulongo wetu. Kabiji atweba bukwasho bwetu ne kumulombelela pe aye, mukaya nanji aye. Kabiji atweba twalomba mba Anweba musa kumupesha aye, Nkambo, konse ko akaya aye. Mu Jizhina ja Yesu. Amena.

Akupeshe, Mulongo Ben! Kuboko kwa kilujo kwa lumvwang'ano kotwapana, nobe balongo bamwingilo. Lesa akupeshe, mulongo.

³⁵ [Mulongo Earl Martin waamba mba, "Mulongo Branham, wakonsha kubika maboko pe amiwa, ngikajike amiwa kwingila nobe kafunga?"—Waku.] John Martin... ["Earl."] Earl.

Baanga bayuka Earl Martin? Baanga baketekela mba aye ye kalume wakwa Kilishitu? Aye waiya kwi atweba kufuma ku... Amiwa naketekela, kufumatu ku jibumba ja ba Pentekosito, kabiji pano Amiwa nalanguluka mba aye utangijila kabiji wingila mingilo yimena.

³⁶ Amiwa namuyuka Earl kwikala kalume wakine wa Kilishitu. Amiwa kechi kalubako kyubilo kimo ne, bavulu bajinga na, bino kimo kyubilo kiji na Earl. Amiwa navuluka bufuku bumo bamwichile kimye kyo Amiwa najinga mu Dallas, Texas; nangwa Amiwa—Amiwa naketekela, ine, kyajinga... [Nyenga waamba mba, "Beaumont."—Waku.] Beaumont, Texas, abyo ibyo, nyenga. Kabiji abo—abo... Aye mwananji wajinga walala, ubena kufwa, kabiji abo balangulukile mba wafwa kala. Kechi wapemenenga ne. Kabiji Earl walengele lwito lwakuzhokoloka mukibamba, nobe batata, bipuzhi byabo kasa byasendama, baimene kulutwe yami, abo Amiwa najinga pamwaanya. Lupukaimo; aye wabikile maboko anji pe amiwa ne kwamba mba, "Mulongo, Amiwa naketekela mba obewa wi ngauzhi wakwa Lesa. Amiwa kimye kyonse naketekejile kyokyo. Kabiji inge wakonsha kwamba kyambo, nangwa mwaana wami wafwa, bino ukekala na bumi." Kabiji aye mwananji wabwelele ku bumi, ye mumi.

³⁷ Kana anweba mwaketekela mba aye wafikilamo mu kuboko kwaluvwana'ano kwabupopweshi kwa kilujo kwa baabo baitabila? [Kipwilo kyaamba mba, "Amena."—Waku.]

Twayai tulombe, balongo, atweba byo tubena kubikapo maboko pe aye.

³⁸ Taata Walusa Wamwiulu, twatenteka maboko, ne jikwabo, pa Mulongo Martin. Atweba twamutuma aye, Nkambo, kwakapelako mumantanda amba Anweba bomwaikajikilejimo boafwainwa aye kuyako; kijikyonse kyafwainwa kwikala, bavula nangwa bakepa, mu-tulolo, mumikwakwa ikantampe, nemwapelela, inge kyafwainwa byonkabyo. Kijikyonse kyafwainwa kwikala, Nkambo, lekai mapesho Enu ekale pe aye. Atweba twabika maboko etu pe aye byonka atweba byotwabika lubilo Lwenu pe aye kabiji ne kumupa mapesho enu, amba Mupashi uji pe atweba, Nkambo, lekai aye nanji, kabiji ukamutangijila ne kuya kuyonkaya mweo yataika nemwapelela kabiji ne mumikwakwa ikantampe. Atweba twamutuma, mu Jizhina ja Yesu Kilishitu. Amena.

Lesu akupeshe, Mulongo Martin. Yanga pano, kabiji aye Nkambo ekale ne obewa.

³⁹ Mambotu a kintu kimo? [Mulongo Richard Blair waamba kwi Mulongo Branham—Waku.] Richard ke jizhina jobe? [“Ibyo. Richard Blair.”] Baanga bayuka Richard Blair? Baanga baketekela mba aye ye kalume wakwa Lesu? Aye wafuma ku—ku jibumba ja kipwilo kya United Pentekosito.

Kabiji mulongo, Mulongo Blair, Amiwa navuluka lwito lukatampe, lwa aye mwine. Amiwa navuluka kimye Mulongo Blair kechi wakonsha ne, kechi wakebelenga kwitabila amiwa ne, mambo awa wajinga namupashi waingijilenga nanji, wamubuujilenga mba Amiwa najinga wabubela. Kabiji kimye kyo aikele monka mu mumbungeno, aye Mupashi Wazhila waalulukile ne kumwita. Kabiji aye wajinga winengezha na—na kwabanya, kabiji akya kyajinga mba aye ekale muyewa musango.

Kabiji Amiwa navuluka mukazhanji wabutemwe wangichile amiwa juba jimo. Aye waambile mba, “Mulongo Branham, Amiwa naketekela mba Richard ubena kufwa.” Kabiji aye wajinga na, Amiwa naketekela, na sikafu. Aye waile na kumubika pe aye, nobe byonka abyo Amiwa namwipwizhe, kabiji ne kulomba. Awe uji pano.

⁴⁰ Mwaana mucheche wajinga mu mapuso, nangwa, [Mulongo Blair waamba mba, “Nsongwalume wami.”—Waku.] nsongwalume wanji, mumapuso, akyo kyobabujile kuketekela kyabaya amba, mwaila kupwisha kwa milanguluko. Kabiji namambo amilombelo, nangwatu pajinga pakamulupi, awa mwaana wabukilwe.

Bushe anweba mwaketekela mba Mulongo Blair ke kamonyi wakine wa Kilishitu? [Kipwilo kyaamba mba, “Amena.”—Waku.] Anweba lombai mba mapesho enu aye nanji.

Batemwe, bikai maboko enu pe aye.

⁴¹ Mutemwe Lesa, mukutuluka awe mulongo wetu wawama, Kalume wenu, ao waiya ne kufuma ku jibumba janji, ne kwenda mu Kyeya. Taata, atweba twalomba mba Anweba musa kupesha Mulongo wetu Blair, byo tubena kumutuma na mapesho etu ne kumwikajika, kupichila mu maboko etu pe aye, konse Anweba ko mwakonsha kumwita, Nkambo, kuyense mwingilo ye afwainwa kwingila. Lekai Mupashi Wenu aye na Mulongo Blair. Mutangijilai ne kumutwala aye kuyoya myeo yataika ne ibena kufwa pano pantanda, pakuba mba aye akatane awa mukoko wataika, pakubamba aye akakonshe kumubwezha awa mujitanga. Konse ko kyafwainwa kwikala, kyonse Anweba kyo muji nakyoye, Nkambo, atweba twalombatu mba Mupashi Wenu amutangijile kabiji nemonse mu lwendo lwanji lwa bumi bwanji. Atweba twi batemwe banji. Kupichila mukupana kuboko kwa kilujo kwa lumvwang'ano lwabupopweshi, atweba twimulomba Anweba kuya nanji, mu Jizhina ja Yesu Kilishitu. Amena.

Akwa kuboko kwa kilujo kwa lumvwang'ano lwabupopweshi! Lesa akupeshe, Mulongo Blair. Atweba tuji ne obewa, anduleendi paseti, ba kulombelela obewa kabiji ne kuuba kiji kyonse kyo tukakonsha kukukwasha obewa. Lesa akupeshe.

⁴² [Mulongo Merlin Anthon waambile mba, “Akye kijitu pamo ne amiwa, Mulongo Branham, mu kutenteka.”—Waku.] Kwaamba ka? [“Kutentekewa.”] Yobe ng'anyi? [“Merlin Anthon.”] Merlin Anthon. [“Amiwa nji mu kipwilo.”] Kwepi? [“Muno mu kipwilo.”] Mu kipwilo. Muntu yense wayuka Mulongo Merlin Anthon? Aye ke mupya, kwi amiwa. [“Na Mazhita a Bashilika ba Lupulukilo. Vulukaipo amiwa?”] Oo, ee. Ndekelaiko mambo amiwa, mulongo.

Kufuma ku Mazhita ya Bashilika ba Lupulukilo, abyo ibyo, Amiwa na muvuluka aye. Kine, Amiwa namuyuka pano aye. Amiwa naubiletu. . . Aye kilungi kyanji kechi kyamwekele kyayukanyikwa kwi amiwa pa kyokya kimye ne, pa kino kimye. Baanga bamuyuka mba aye ye muntu wakwa Lesa? [Kipwilo kyaamba mba, “Amena.”—Waku.] Baanga baketekela mba—mba Lesa ubena kwingila nanji? Sutulai maboko enu. [“Amena.”] Anweba musakumulombelela nyi? [“Amena.”]

⁴³ Pano, mulongo, atweba twayuka mba obewa ubena kufuma ku jibumba jikatampe ja bantu, Bashilika ba Lupulukilo, ke bantu bakatampe. Bino, kabiji, bino Bashilika ba Lupulukilo bengila mwingilo mukatampe mu mukwakwa. Atweba kechi twakonsha kwambapo kintu nangwa kimo kiyatama na ba Nazarene ne, kipwilo kya Pentekosito, nangwa Bashilika ba Lupulukilo, nangwa bamo mwiabo; abo ke batemwe betu. Bino, mwamona, atweba twaketekela mba atweba twibakusenda ino Mbila ikatampe pa kino kimye akyo atweba kiyotubena kwikalamo. Anweba mubena kukeba kuuba kyokyo pamo ne atweba? [Mulongo Anthon waamba mba, “Amena.”—Waku.]

Twayai tukunyike mitwe yetu byo tubena kubika maboko etu pa mulongo wetu.

⁴⁴ Mutemwe Taata Wamwiulu, Anweba yenu Iye mwita. Anweba yenu Iye usangulula Kyambo, pakuuba mba bakonshe kuketekela. Kabiji atweba twabika maboko etu pa mulongo wetu wawama, nobe kwikajika mba atweba twaketekela mba Anweba muji nanji kabiji mukamukwasha aye. Atweba twatuma mapesho etu pe aye, amba atweba twaketekela mba twapitaila kufuma kulufu kuya ku Bumi kabiji pano kasa twalama Bulume bwakusangulwa mu michima yetu, monka mu bupe bwa Lesa, atweba twabika maboko pa mulongo wetu ne kumutuma na mapesho etu, amba Anweba mukamutangijila aye ne kumukwasha kabiji ne kumutwala konsetu kwaya ntanda, Nkambo, abye Anweba byo mwamutenteka aye kuya. Lekai Mupashi Wenu aye nanji ne kumupa butuntulu bwawama, ne ngovu, kabiji engile kyaitabilwa mu mwingilo wanji, mambo atweba twamutuma mu Jizhina ja Yesu Kilishitu. Amena.

⁴⁵ Lesa akupeshe, mulongo. Ako ke kuboko kwa kilujo kwa lumvwang'ano lwabupoweshi, mwayukatu, balongo mwimunai na maboko enu, batemwe muyewa musango. Nanchi abyo byo byo muji. . . Kijitu bulongo, aye Nkambo emupeshe anweba bonse.

⁴⁶ [Mulongo Carrell waambile mba, “Amiwa—Amiwa kechi nekyubile, muluntunanwa ne. Nasaka namba obewa ubike maboko obe pe amiwa, nobe boba, mu Jizhina ja Yesu.”—Waku.] Obewa, kyonse kyo ukeba. Kabiji ne wenu. . . [“Kimye kya kwikala, kabiji ne kwikala nabo pamo.”] Pano jizhina jobe yobe ng'anyi? [“Mulongo Carrell, kufuma ku Cincinnati.”] Mulongo Carrell.

[Mulongo Carrell waambile mba, “Amiwa najinga wamwingilo watentekewa, bino Amiwa kechi naswilenga na mulongo ao watentekelenga nebana bakazhi amba bamwingilo, kabiji Amiwa akyo kyonafuminemo.”—Waku.]

Awe ke Mulongo Carrell kufuma ku Cincinnati. Uji yense wamuyuka Mulongo Carrell, suntulaiko enu. . . Kwikala wafuma ku Cincinnati, Amiwa ne kizhinauka, akyo kyayuka uji yense. Aye waamba mba aye wajinga na jibumba, kabiji ne jibumba jakebele mba batenteke bana bakazhi kwikala bamwingilo. Aye kechi waimene nakyo ne, kabiji aye wajinga wafumamo mwi abo.

Abyo ibyo Amiwa monafumijilemo mu Missionary Baptists. Dokotala Roy E. Davis, baanga bamumvwine aye? Kine, mwikyubile, mwamona. Aye wakebelenga kutenteka banabakazhi basapwishi, kabiji Amiwa naambile mba, “Ine, mwane. Nobe mukulumpe,” Amiwa naambile mba, “Amiwa kechi nakonsha kwikyuba akyo ne, mwaila milanguluko. Akyo ke kyaimena akya Kyambo kya Lesa.”

⁴⁷ Amiwa kechi nakuyuka ne, Mulongo Carrell. Bino namwaila lushimuno lobe, kabiji ne Bukine bowaimenapo. . . Atweba

kechi tujipo na kintu kimo kyakwimena aba banabakazhi ne. Abo ke banyenga. Atweba twibatemwa. Bino atweba twaketekela mba abo baji na kifulo kyabo, kabiji amba abo bafwainwa kwikala. Mwamona? Kabiji atweba twaketekela mba abo kebatwemwikwa ku mwanamulume, ke bankwasho. Kabiji nangwa pachechetu kechi kyalumbulula mba... Atweba tulanguluka mba ke kya bupe kikatampe, pangye ya lupulukilo, akyo Lesa kyo apaine ku mwanamulume ne. Bino aye kechi uji na kifulo mu pupiti ne, mwayila Kyambo kya Lesa ne. Pa kyokyo kyowaimanapo, kabiji ne lwitabilo lobe mwi Lesa, atweba twabika maboko pe obewa, nobe lumvwang'ano lwa bupopweshi, kwiya pamo ne atweba.

Twayai tubike maboko etu pe aye.

⁴⁸ Mutemwe wetu Taata Wamwiulu! Awe mwanamulume mwanyike, Amiwa nakonsha kuyukatu byo abena kumvwa aye. Aye walupwilwemo mambo akine kya Bukine. Amba, "Muntu kechi ukekela ku shinkwa bunke ne, kana ku Kyambo kyonse." Nanchi atweba twabika maboko pe aye, mukubika mapesho etu pe aye. Lekai Mupashi Wenu amutangijile, kabiji nekumukwasha, kabiji ne ku mutangijila mu lwendo lonse lwa bumi bwanji ne kuya konse ko mwakonsha kumutuma Anweba, Nkambo. Lekai aye ayuke akyo atweba kyotubena kumulombelela aye, kabiji tukekala bukwasho kwi aye, kabiji ne kumutundaika kikulutu aye ukakonsha kwimana na Bukiine. Kiswishai kye, Nkambo. Atweba twamutuma aye, mu Jizhina ja Yesu Kilishitu. Amena.

Lesu akupeshe, Mulongo Carrell.

Anweba kana kwibabikatu maboko, apusapusana umo nemukwabo. Anweba bonse mwapanana maboko a kilujo awama a luvwan'ano abupopweshi.

⁴⁹ Mulongo Ruddell, kuno, kechi watentekewa luntunanwa kuno ku kipwilo ne. Bushe... Baanga bayuka Mulongo Ruddell? [Kipwilo kyaamba mba, "Amena."—Waku.] Atweba bonse twamuyuka. Baanga bayuka mba aye ye muntu wakwa Lesa? ["Amena."]

Mutemwe wetu Taata Wamwiulu, atweba nobe bakulumpe Benu babika maboko pe yiwe mulongo ao waenda kufuma panshi pene, mumema amateshi. Aye wamona jibumba janji kasa jibena kuponako. Aye wamona byonse kasa bibena kufikizhiwa, bino nangwa byonkabyo kasa aitabila. Nangwatu ba...?... Atweba twabika maboko etu pe aye, kabiji ne kupana mapesho etu kwi aye. Mushingai manyi, aye Nkambo, na bulume, na Kyambo, Nkambo, kabiji ne kumutuma pa bilengwa byonse bya pantanda!...?...lekai ekale pe aye ne ku mukwasha. Kabiji ne kumutuma aye, mu Jizhina ja Yesu Kilishitu. Amena.

⁵⁰ Mulongo Ruddell, kimye kyonse uji na kuboko kwa kilujo kwa lumvwang'ano lwabupopweshi. Amiwa nayuka Mulongo

Ruddell. Umweka nobe—nobe nsongwalume wami. Aye bashanji ne Amiwa, maama, twiyuka umo ne mukwabo pa kimye kyabaya. Kabiji Amiwa namuyuka Mulongo Ruddell mba ke kalume wakwa Lesa. Amiwa naingila nanji. Lesa akupeshe, Mulongo Ruddell.

⁵¹ Jizhina janji ng'anyi? Yobe ng'anyi, mulongo? [Muntu umo waambile mba, "Mulamu-wa-kwa Mulongo Martin."—Waku.] Mulongo Martin, wamuyuka aye, Mulongo Martin?

Jizhina jobe yobe ng'anyi? [Aye mulongo mukwabo waambile mba, "Rev. McComas."—Waku.] Mulongo McComas. Amiwa naketekela mba pano kechi pajipo nangwa umo muno wamuyuka ne, bino aye uji. . . Ee, awe muntu wamuyuka, Mulongo Tyler. Kabiji aye ubena kwiya naku. . . mukumubika maboko pe aye, amba aye ekale wakusenda ao Mamboawama. Mulongo McComas, kwepi ko wafuma, Mulongo McComas? ["Rockford, Illinois."] Rockford, Illinois. ["Anweba mwaichile nzubo yami, mulungu wapwa, nangwa Pakimo bufuku, ne kulombelela bakazhi bami."] Oo, abyoyi byo nyi? Kufuma ku Tucson. ["Tucson, Arizona."] Oo, Amiwa navuluka lwito pano. ["Aye wabukile lukeelo lwalondejilepo."] Jitotwe ja Nkambo!

[Mulongo Martin waambilepo kintu kimo kwi Mulongo Branham—Waku.] Kwaamba ka? ["Nyenga yami mwanyike."] Nyenga yobe. ["Uji kuno pakino kimye. Wajinga na kalepu."] Nanchi, uji kuno pakino kimye, walombelejilwe, bufuku bukwabo, kufuma ku Tucson, na telefoni. ["Wajinga na kalepu."] Kya- . . . ["Aye wajinga na kalepu, kabiji aye uji kuno pakino kimye."] Aye wajinga na kalepu, mafuku acheche apitapo, kabiji aye uji kuno pano. Mulongo Martin wakiyuka, mulunda. Oene mambo aye kyo abenaukebela kusenda Mbila!

Twayai tubike maboko pa mulongo wetu.

⁵² Mutemwe Lesa, Amiwa nabika maboko, na baabo bakwabo, pa kalume Wenu, kabiji nekumupa aye kuboko kwa kilujo kwa lumvwang'ano lwabupopweshi, nalomba mba mapesho akwa Lesa ekale. . . . amba Anweba mumutenteke kwikala aye byo aji. Mapesho enu ekale pe aye, kabiji ne kumukwasha ne kumutangijila aye, mu Jizhina ja Yesu Kilishitu. Amena.

Akwa kuboko kwa kilujo kwa lumvwang'ano lwabupopweshi, mulongo wami, kabiji aba bekale ne obewa. Lesa ekale ne obewa.

⁵³ [Muntu umo waambile mba, "Mulongo Branham?"—Waku.] Ee, mulongo? ["Amiwa njina umo ubena kukeba kikye ne aye."] Kijitu bulongo, mwane. Amiwa naketekela mba awe ye. . . ["Mulongo Darris."] Mulongo Darris. Amiwa kechi. . . ["Amiwa namuyuka Mulongo Earl ne Mulongo Brewer."] Awe muntu ke Mulongo Darris. Kwepi ko mwafuma, mulongo? ["Black Rock, Arkansas."] Black Rock, Arkansas. Mulongo. . . ["Amiwa namuyuka, mulongo."] . . . wamuyuka aye. Muntu mukwabo,

Amiwa naketekela, papo, waambile mba...Mulongo Brewer. Amiwa naketekela mba Amiwa nebasambakana, lukeelo luno. Kabiji—kabiji Nyenga Vayle, Amiwa nalanguluka mba, Mulongo Vayle, ne abo bamuyuka aye, kabiji twamuyuka aye kwikala muntu wakwa Lesa, kalume wakwa Lesa. Kyawaina!

⁵⁴ Kyawama, pano, mulongo wami mutemwe, kwikala ke wakusenda Mbila, atweba twakeba mba obewa uyuke mba atweba tukemana kunyuma yobe, ne kuuba byonse byo twakonsha kuuba. Atweba tukakulombelelangako obewa, amba ne obewa ukekale wakusenda ino Mbila konsetu kwakalepa kubifulo ako Lesa koakakutuma obewa kuyako.

Twayai tubike maboko etu pa Mulongo Darris.

Mutemwe Lesa, atweba twabika maboko etu pa mulongo wetu, mukumupa kuboko kwa kilujo kwa lumvwang'ano lwabupopweshi, kabiji mutumai aye mu Jizhina ja Yesu Kilishitu, amba Anweba mumushinge manyi aye. Kabiji...?. . .mupai aye kuboko kwa kilujo kwa lumvwang'ano lwabupopweshi!...?. . .Kabiji Mupashi Wenu aye nanji, na kumukwasha aye kabiji nekumutwala aye, mu Jizhina ja Yesu Kilishitu. Amena.

Lesa akupeshe, mulongo.

⁵⁵ Pano, Amiwa naketekela mba, Mulongo Anthony. Anweba bavula mwamuyuka Mulongo Anthony. Aye wajinga kuno ne atweba pa kimye kyabaya. Amiwa namuyuka mba aye ke kalume wakwa Kilishitu, amiwa mwine. Amiwa naketekela mba ke mwanamulume mwanyike wipana. Aye kechi wabikiwa maboko pe aye ne. Aye kechi wayukile mba akye kibena kwiya ne, balunda. Mwamona? Bino pakino kimye kijitu bulongo nobe bakwabo. Nanchi atweba tusa kubikapo maboko pa Mulongo Anthony kabiji ne kumupa kuboko kwa kilujo kwa lumvwang'ano lwabupopweshi. Lesa yewa kutenteka. Akye ke kyakuyukanyikwatu kwi aye, kabiji mwayukatu, kuuba mba atweba twaketekela yuwe mulongo kabiji twamutemwa aye, kabiji aye ye umo wamwiatweba, mu Mbila. Kabiji atweba twakeba mba aye ekale na mapesho akwa Lesa, kabiji abyo ibyo byo twamwipuzha. Twayai tulombe, byo tubena kubikapo maboko etu pa, mulongo.

⁵⁶ Mutemwe Lesa, awe wikepesha mucheche, kalume Wenu mwina Italy, Nkambo, waiya bufuku buno, na—na kubika maboko pe aye, kabiji pano kuboko kwakilujo kwa luvwañano lwa bupopweshi kwaikajika kala pe aye, kufuma ku kipwilo. Nkambo, Bulume Bwenu bukantampe bumutume awe songwalume mucheche mumapuzha mwaya ntanda kabiji ne kubilengwa byonse akwa komukamutuma aye Anweba. Kabiji lekai aye ne kupokolola bantu kufuma ku bubi ne misongo, kabiji ne kwingijila Anweba, Nkambo, moba onse a bumi bwanji. Lekai Anweba mumutangijile, mukwashai aye. Lekai

mapesho etu ekale ne aye, byo tubena kumutuma, mu Jizhina ja Yesu Kilishitu. Amena.

Lesu akupeshe.

⁵⁷ [Muntu umo waambile ku Mulongo Branham—Waku.] Uu? Oo, Amiwa kechi nayuka ne. Atweba tuji pa kunungakana kwa mafoni; maseti fifite pa mineti umo. Kwajingapo muntu umo mukwabo kuno wakebelenga mba . . .

Nyanta papo kuno ne kwita jizhina jobe, byonka byouji, batemwe, byonka biji mumaikolofoni panka *pano*. Babulaitu abo. [Kila mulongo etongele jizhina janji, “Pat Tyler,” “Claude Boggess,” “Dale Potter,” “. . .? . . . Henasey,” “James Humes,” “Earl Horner.”—Waku.] Bushe akyo ikyo nyi? [Muntu umo waambile mba, “Ee.”] Batemwe bami.

Anweba banabalume, mwaketekela mba aye Mbila ya Bukine kufuma mu Kyambo kya Lesu? [Batemwe baamba mba, “Amena.”—Waku.] Kana anweba mwaketekela kyokyo na muchima wenu yense nyi? [“Amena.”] Kijitu bulongo. Kabiji obewa ujinalusako, ne kulanguluka mba inge twabika maboko pe obewa . . . Atweba twakeba mba obewa uyuke mba tuji pamo ne obewa, kabiji atweba tusa kuuba kiji kyonse kyo twakonsha kuuba pakuuba mba tumukwashe.

Kabiji pano Amiwa nakeba anweba balongo, pakuuba mba Amiwa nakonsha kubika maboko pe abo ne apo, pakuuba mba mfike ponka pano. Kabiji twayai tukunyike mitwe yetu, byo tubena kubikapo maboko pe abo.

Mutemwe Lesu, aje ke jibumba ja bantu. Amiwa nabika maboko ami pa umo umo, mu Jizhina ja Yesu Kilishitu, Mwaana wakwa Lesu. Kabiji lekai Anweba, Ao wibeta mba bekale bamwingilo, amba baka sapwilenga, Nkambo, moba onse a bumi bwabo, kabiji . . .? . . . sapwila Mamboawama ku kilengwa kyonse. Atweba twibapa kuboko kwa kilujo kwa lumvwang’ano lwabupopweshi, kabiji lombai mapesho Enu ekale ne abo, Nkambo, byo tubena kwibapesha, tumai mapesho etu. Lekai baaye kukukilengwa kyonse kya pano pantanda Anweba bomwaita kuyako. Lekai abo bengile kabiji bengijishe mwaila bulume Anweba bomwibeta Anweba abo kuba. Lekai bekale bakosa kabiji bakalume ba kwa Lesu bakine. Kiswishai kye, Nkambo. Kabiji atweba twikipuzha mu Jizhina ja Yesu Kilishitu.

⁵⁸ Lesu emupeshe, umo umo, balongo. Lesu emupeshe. Lesu emupeshe, mulongo. Lesu emupeshe. Lesu akupeshe, Mulongo Humes. Aye Nkambo ekale ne obewa, umo umo.

Kipeshiwe akya kyakasa pamo
 Michima yetu mu butemwe bwa
 Bwinakilishitu;
 Lumvwang’ano lwa bupopweshi bwa bamaana
 amo

Kiji pamo nobe popa Peulu.

⁵⁹ Bushe Aye kechi wawama nenyi? Pano langulukaipo, baanga ba mwingilo baji muno bufuku buno babikile maboko pe abo!

⁶⁰ Amiwa kechi nayukile mba tuji pa kunungakana kwa mafoni ne. Inge bantu baji konka bakonsha kundekelako mambo pa kyokyo; Amiwa kechi ne kiyuka ne. Mwamona? Amiwa kechi najikuyuka mba babena kunungakana na Mbila icheche bufuku buno ne. Bino atweba . . .

⁶¹ Pano tusakutanga Kyambo ne kulomba, kabiji ne kutwela mu iye Mbila ayo Amiwa yo mbena kumvwa mba Mupashi Wazhila wakonsha kuleta kwi anweba bufuku buno.

⁶² Kabiji pano kimye kyo tubena kuzhikula jibiji mu . . . kibaba, Amiwa nsakwikibijika mu kimye kicheche. Twayai tuzhikule mu Kubala, kyapitala kyabu 22, veeleshi 31. Kubala 22:31, kufika pa kibaba. Kimye kyo mubena kuzhikula, inge mwaatemwa kutanga, kitangai nangwa kubikapo kiyukilo.

⁶³ Amiwa nasaka mba anweba bonse muvulukeko, poso Amiwa kemumone jibiji, Amiwa naketekela, kimye kimo pa kino kimye kya kisalo, inge Nkambo waswa. Kabiji inge kintu kimo kyamweka, Amiwa kechi ngya ku bushiya bwa tulunga ne, Amiwa kabwelatu. Bino atweba pano twaketekela mba, mubyonsetu byaingijiwa pano, amba Mupashi Wazhila usa kwituntumina pakino kimye mu jishinda ajo Aye joasalulula Aye mwine amba etuntume atweba. Kabiji ajo jo jishinda atweba jo tukebelamo kwikyuba. Aye Nkambo apeshe!

⁶⁴ Taata, atweba tuji pepi kutanga Kyambo Kyenu. Mwakonsha Kupesha ne Kwikishinga manyi mu kukwatakanya kwetu, atweba twaipuzha mu Jizhina ja Yesu Kilishitu. Amena.

⁶⁵ Aye Buuku wa Kubala, kyapitala kyabu 22 ne veeleshi wabu 31.

Kabiji aye NKAMBO washikwile meso akwa Balamu, kabiji wamwene malaika wa NKAMBO kasa aimana mujishinda, kabiji poko yanji mukuboko kwanji: kabiji aye wakunyikile mutwe wanji panshi, ne kupona kilungi kyanji.

⁶⁶ Pano, pakutanga kikye kibaba, mukushimika bine byambo bijipo, Amiwa nasaka kusendapo mutwe: *Kana Lesa Wakyalulapo Milanguluko Yanji Pa Kyambo Kyanji?*

⁶⁷ Akya akye kekibaba kyawama, kabiji ke kikatampe Kyabukine akyo atweba kyotwafwainwa kukwatankanya. Bushe Lesa wakonsha kwambapo kintu kiji kyonse kabiji ne kwamba mba, “Amiwa mundekeleko mambo Amiwa ne kyambile”? Bushe Lesa wakonsha kusingya Kyambo Kyanji, panyuma Aye Wikyambile?

⁶⁸ Pano, mu iye ng’ambilo, ene mambo ao Amiwa nasalulula iye ng’ambilo, ke namambo ayoya ng’ambilo ya Mubaibolo aya

utaanga, kweseka kumona, nangwa kweseka kwamba mba Lesa kana walula milanguluko Yanji; akye kyakonsha kwikala noobe Aye waalwile milanguluko Yanji kukila pa kifulo kiji kyonse mu Baibolo, akyo Amiwa kyonayuka, mambo Aye wabuujile Balamu kintu kimo kabiji ne kumubuula kikwabo. Kabiji pano, bantu bavula baeseka kukeba kulenga Balamu wabyonkabya, oo, wajinga ñanga nangwa kintu kikwabo. Bino Balamu kechi wajinga ñanga ne. Aye wajinga ngauzhi wa Nkambo.

⁶⁹ Pano, atweba twakeba kutolamo monkamwe Mbila, pantashi. Isalela wajinga palwendo kufuma ku Palas-...kuya ku Palasitina, kufuma ku Ejipita. Kabiji Nkambo wajinga nabo, kabiji bajinga...Mulwany yense waimene ku meso a Isalela bamufumishengamo mu jishinda, mambo Lesa waambile mba Aye ukatuma nyuki palutwe yabo kabiji bikapalanganyamo balwany babo, kikulutu abo baendelenga mulukokelo ku mukambizho Wanji. Awa mwingilo kechi wabayiletu bingi ne. Aba bena Amaleki babiyangala ba muba abo, kechi bajinga nakintu kubena Isalala ne. Nangwa abo bajinga bantu bacheche mu kipimo kya kimino, bino abo baendelenga mu ABYO BYOBYAAMBA AYE NKAMBO. Nanchi nagwa bulwanyi bwikale byepi, Lesa kimye kyonse wamwene mba Byambo Byanji bya mulaye kechi byakankelwe Isalela ne.

⁷⁰ Kabiji Isalela wa mu Lulayang'ano Lwakala ke kipasha kya Musongwa wa mu Lulayang'ano Lupya, kwiya kufuma mu—mu ntanda, na kuya nakwenda mu mukwakwa wa kuya ku Kenana, nangwa Kenana ye tubena kuya, mu Myaka kiumbi kimo.

⁷¹ Pano, pano, atweba twamona Moabu papo ke kipasha kya kipwilo. Kabiji Moabu...Abo bafuminetu nakwibatapa ba mamfumu bamo kabiji bashinjile balwany babo, baipaile bonsetu nebyonsetu, ba angachile mushiji, kabiji ne kufumyapo bena Moabu. Bino, Moabu kechi wajinga nangwa na kyaalo kya bukinshi ne. Moabu wajinga kyaalo kimo kyaingijilenga aye Lesa umo yenka Isalela ye aingijilenga. Kabiji ntanda ya mu Moabu yatatwijiilwe na mwaana wakwa Lota, na mwananji wamukazhi. Kabiji aye kwikala mwine kitendekesho kyakino kyalo, kabiji aye wanengezhezhe bayukanyikwa mubyakwimba ne bintu bikwobotu, kabiji ne kulenga kyalo kikantampe kyalupukilemo, kabiji abo bananukile bingi ne kuya.

⁷² Kabiji, pano, Isalela wajinga wa mu lukunwa wakwa Abulahama, kechi Lota ne. Isalela wafumine kwi Izaka, Yakoba. Kabiji Isalela wafumine mu mikoka twelufu kufuma kwi Yakoba, ao watelelwe mba “Isalela palutwe,” mambo aye walwile ne Nkambo. Kabiji Moabu kuno...

⁷³ Pano, mu kikyeye, kabiji anweba bantu muji mu—mu ma telefoni, Amiwa nasaka kwamba patanshi mba Amiwa—Amiwa kechi nakeba kwikala walupata ne, kabiji Amiwa naketekela mba Amiwa kechi byonji ne. Bino, Mbila yapanwa kwi amiwa,

Amiwa nafwainwa kwikala wakishika ku yoya Mbila, nangwa Amiwa nkekala kafutufutu. Mwamona? Amiwa—Amiwa kechi nakonsha kwambapo kintu nangwa kimo ne kanatu abya Amiwa byo natuma kwamba.

Kabiji Amiwa—Amiwa mbena kulanguluka mba mulwanyani mukatampe wa kijiji kya Bwinakilishitu leelo jino ke bipwilo bya bukabungwe. Amiwa naketekela na muchima wami yense amba akya kikekala kayukilo ka lukinyama kumpelo, akyo ikyo Amiwa nakonsha, kulanguluka mba Amiwa nakonsha kushinikisha kyokyo na Baibolo na bukwasho bwa Lesa. Amiwa nekyuba kala. Amba, akya kikekala mumusango wakiyukilo kyalukinyama, mu tubungwe twabipwilo. Mambo, Lesa kechi waubilepo, kimye kiji kyonse ne, aye ke watulukilepo kipwilo kyabikilweko, kipwilo kya bukabungwe, kechi byo kyaubilwe ne. Aye kechi wikyubilepo ne.

Kabiji kimye kyonse muntu kyo alengele ka kabungwe, Mupashi wakwa Lesa wamulekele kabiji kechi wabwelele jibiji ne. Ipuzhai uji yense wamashimikila apita, nangwa anweba mwibakutanga anwebene. Kechi! Kimye kyo babungizhe bukabungwe, Lesa wabikile pakyokya kyakupembelelapo, kabiji apo ipo po kyayile; kyaikele, kufumatu ponkapa. Abo bakomene na bamembala bavula, bino kechi kyajinga Mupashi wakusangulula ne; kechi kyajingako, nabyavula ne.

⁷⁴ Moabu, papo, ke kipasha kya kyokyo, mambo bajinga na—na kyaalo kya bukabungwe; mu ntanda yabo, nobe mu madinominesheni abo. Kabiji akwa bajinga na bumpopweshi bwabo abo bene, kabiji bupopweshi bwabo bwajingatu bupopweshi bwajinga bumo nabwa bena Isalela bo bajinga nabo. Abo bajinga bena Muabo kabiji baketekejile mwi Yehoba Lesa, bino bajinga jibumba ja bantu ba bukabungwe.

⁷⁵ Kabiji, pano, abo byo babena kwimenako kipwilo kya ku mubiji, Isalela waimenako kipwilo kya bumupashi mulwendo. Pano, Isalela kechi wajinga kyaalo kya bukabungwe ne. Kikulutu abo balondejile Lesa, abo bajinga baana babene. Abo baishile, nobe bakang'enda, kechi bajinga nakifulo kwakuya ne. Kuji konse kwailenga Mumbulungwa wa Mujilo, baile Naye. Abo kechi bajinga kyaalo kya bukabungwe ne. Abo bajinga nabukabungwe mukachi kabo, mambo awa mukanda wapewe kwi abo kupichila mumukambizho wa Lesa, bino kechi kwajingapo kyaalo kya bukabungwe mu kino kimye ne. Kimye pano abo pobaiketele kyalo kyabukabungwe, ipo pano abo pobakankelwe kabiji ne kumukana Mesiyasa.

⁷⁶ Kabiji pano twatana kuuba mba, kimye kyonse, amba inge abye bya ku mubiji ne bya kumupashi, mipashi ya bipwilo ne tubungwe, byasambaka, kimye kyonse kebiyila mumone. Kikyangye kubiwapo kwikala byobyoyo ne. Kimye kyonse kechi biyila mumone. Mambo, atweba twatana kuuba

mba amwa muji kichima. Kabiji momwa, mu kichima, kileta kupashang'anya kwa buntushi, byakusombolola. Kabiji atweba twikitana leelo, byonka byo kyajinga kyokya kimye. Inge Lesa wauba kintu kimo pa muntu bunke, bantu bonse basaka kulondela bakwabo byonka byauble Lesa pa yewa muntu. Mwamona, akyo kyokileta kwikyombesha, kabiji akyo kyokilenga buntushi. Kabiji nanchi inge abo babula, lubaji lukwabo, kusenda byafumamo byakumupashi, nanchi abo bekisendela mubulume bwa bumulwilantanda, nangwa abo bapingshepo kintu kikwabo, mukuzhingijisha milanguluko ya bantu, mukulengela bana babwanga amba baye kwiabo bane.

⁷⁷ Akyo kine kyo kyamwekele ku ntendekelo; nobe Kaina ne Abela, bonse babiji basongwalume panopantanda. Kabiji kimye Abela kyo apaine kwi Lesa mulambo wawama kukila wa kwa Kaina, kabiji Lesa washinikishe Abela, mu kwikila panshi kabiji ne kutambula mulambo wanji kyalengejile Kaina kwikala na kichima, mambo aye wajinga na kichima na mulongo wanji, ne kwipaya mulongo wanji.

⁷⁸ Akyo kiyatatwile kuntendekelo, amba ku mubiji ne bya bumupashi. . . Nangwa byonkabyo Kaina ne Abela bapopwejile Lesa umo, bonse babiji banshimikile musango umo wa bitapisho, kabiji bonse babiji bapopwejilenga Lesa umo, pa kipwilo kimo, ku kitapishotu kimo. Bino Kaina, mwaila ndangulukilo ya buntushi, waletelimo bipangwa byakujima ne kwibibika pa kitapisho ke mulambo, ne kulanguluka mba kinetu amba abye byafwainwa kukumbula kwi Lesa pa mfuto ya mambo. Nanchi aye wafwaijilwe kuletamo, nobe bantu byo balanguluka leelo, "maapo amba awa Adama ne Eva byo bajile, akya kyaletetele bubu." Kabiji, kiji kyonse, Amiwa nalanguluka pano baji nakyo pa "pomogala" nangwa kintu kimo pa kino kimye. Bamo ba mwiabo baambile mba, kechi papita kimye kyabaya ne, kyajinga kintu kingi.

⁷⁹ Kabiji, bino Abela wajinga na kitapisho kyawama. Aye wayukile mba kyajinga mashi ekyubile, nanchi waletetele mwanamukoko. Kabiji Lesa byo atambwile wanji, pano, Abela, konka kulwitabilo, kupichila mu lumwekesho, kafwako jishinda jikwabo ne. Kechi kwajingapo Baibolo wanembelwe ne. Nanchi, mwamona, ntendekelo ya bololoke ke Lesa ubena kusolola Bukine, kabiji Kipwilo kyonse kya Lesa mumi kyashimikwa pa byo byo.

⁸⁰ Yesu, juba jimo, wafumine ku mutumba, waambile ku banababwanga Banji, "Bantu baamba mba Amiwa Mwaana muntu yami ng'anyi?"

"Umo waambile mba Anweba mwi Mosesa, kabiji ne mukwabo waamba mba Anweba mwi Elaija, kabiji Anweba mwi Yelemiya, nangwa umo wa bangauzhi."

Aye waambile mba, “Pano anweba mwamba mba Amiwa yami ng’anyi?”

⁸¹ Apa ipo pano Petelo mutumwa, watangijilwe namwine Lesa, wasangululwa na Mupashi, waambile byambo byakukumisha bikantampe, “Anweba mwi Kilishitu, Mwaana Lesa mumi.”

⁸² Monai ng’ambilo. “Mwatookwa anweba, Shimona, mwaana Yona, ke pakuba buntunshi bwa nyama ne mashi kechi bobwimusolwelakyo ne. Ba Taata Bamwiulu bobo musolwelakyo. Anweba mwi Shimona. Pajonka jino jibwe...”

Ng’anyi jibwe? Bino, ba Katolika baamba mba, “Pe Petelo, jibwe, jibwe jicheche.” Kabiji ba Polotesitati baamba mba, “Pe Kilishitu, Jibwe.”

Kechi kwikala wapusanako ne; bino kyajinga pa lumwekesho Petelo lo ajinga nalo, Ao Aye byoajinga. “Kafwako muntu nangwa umo wakonsha kwiya kwi Amiwa ne,” byo aambile Yesu, “kanatu Ba Taata bamukoka. Kabiji bonse bobampa kwiba Taata bakeya kwi Amiwa.”

“Anweba mwi Kilishitu, Mwaana Lesa mumi.”

⁸³ “Mwatokwa anweba, Shimona, mwaana Yona; ke pakuba buntunshi bwa nyama ne mashi kechi bobwimusolwelakyo ne, kana Ba Taata banji Mwiulu. Pa jonka jino jibwe Amiwa ponkatunga Kipwilo Kyami, binzhilo bya kalunga kechi Bikekishinda ne.” Kyambo kya Bumupashi kya Lesa kyasololwa!

⁸⁴ Monai, Abela, konka ku lwitabilo mwi Lesa, wapaine kitapisho kyawama bingi. Kabiji waitabila wabutunshi walangulukile mba aya yajinga mingilo ya maboko anji mwine, amba, kabiji bipangwa byanji byawama byapaniwe abyo byoaletele, amba Lesa usakwibitambula, kabiji kechi byaijilemo ne.

Atweba twatana mba Abulahama ne Lota kechi baijile mumone.

⁸⁵ Atweba twatana kuuba mba Mosesa ne—ne Datani, Kola, bajinga nakubula kuyila mumotu.

Mosesa, byo ajinga ngauzhi watongwejlwe jimo na Kyambo kya kwa Nkambo, washinikishe mba wajinga taangi wabo wasalululwa mukyokya kimye, kabiji amba Abulahama walaile byonse bye bintu, kabiji papo Mosesa waubile monka mwaambijile Lesa mba kikobiwa, kikobiwa.

Kabiji Kola, byo ajinga wa buntunshi, wakebelenga kwimika kabungwe mukachi kabo. Aye wakebelenga kulenga jibumba ja bantu. Kabiji Lesa kechi wingila na bantu muyewa musango ne. Akya kyamweka ponkapano, mu kyokya Kinembelo, kipasha kyalwendo lwamujino juba, amba kabungwe kechi kyokyaikajika Lesa ne. Mambo, monka mwaubijile Kola kino, aye waambile kwi Mosesa, “Obewa wasenda byonsetu obewa mwine.” Mu byambo bikwabo, “Kipwilo kyonse kyazhila! Kika,

obewa waamba mba yobe yenkatu muntutu wazhila. Obewa kechi ujipo na nsambu ya kuuba byobyoye ne. Obewa weseka kwibika obewa mwine kwikala muntu mukatampe. Atweba bonse twi bazhila. Atweba bonse twi baana bakwa Lesa.”

⁸⁶ Kabiji Mosesa waalulukiletu na mutwe wanji ne kufumako. Aye waambile mba, “Nkambo, kika Amiwa kyo nsakuba?”

⁸⁷ Lesa waambile mba, “Ipatuleko obewa mwine kufuma kwi aye. Amiwa najinga na byavula bingi.” Kabiji Aye wamuminine namushiji wapano pantanda.

⁸⁸ Mwamona, kechi kwajinga kuyila mumone. Uvwe buntushi ne bumupashi byasambakana, kechi biyila mumone. Kimye Yudasa ne Yesu byo basambakene, kechi kwajinga kuyila mumone: Umo, wajinga Mwaana wakwa Lesa; ne mukwabo wajinga, mwaana wakwa Satana. Byonka byajinga Kaina ne Abela, kechi bayijile mumone kimye kyobasambakene. Umo wa mwiabo wajinga kalama wa kipwilo, kabiji mukwabo Umo wajinga kafunga. Kabiji nobe pano, atweba twaiya mu jino juba, ku kintu kimo ne jikwabo. Keku dinominesheni wa butunshi ku Musongwa wa Kilishitu wabumupashi. Aye Musongwa wa bumupashi wakwa Kilishitu waikala wapusanako bingi ku tubungwe twabuntushi, poso mwiabo bonse mwaikala kyakubula kupashan’ana.

⁸⁹ Pano monai, byakumubiji kimye kyonse byeseka kupasha byakumupashi. Bino, byonka biji Yakoba ne Isao, kechi kyakonsha kwingila ne. Kechi kyakonsheka kubiwa ne. Pano, inge kyafika pa kwingila mingilo yawama, Amiwa—Amiwa naketekela mba Isao wajinga muntu wawama kukila Yakoba, ku meso a bantu. Aye waesekele kulama bashanji; aye wajinga mpofu, ngauzhi. Kabiji ne byonse bye bintu byo akebele kuuba, bino nangwa byonkabyo Isao kechi walangulukilenga pa iye mingilo ya buntunshi ne. Aye walangulukile mba wakonsha kutwelamo kupichila mu byo auba, obepo kintu kimo kyawama pa muntu umo, akyo kyajingatu bulongo. Bino Yakoba, mweo wanji yense wajinga nakukeba kutambula abwa bubeji, kabiji abyo Lesa byo ayukile mwi aye mu bumupashi.

⁹⁰ Monai, kabiji ke buntushi kimye kyonse bulengela kupata bumupashi. Akya kyalengejile Kaina kupata Abela. Akya kyalengejile Kola kupata Mosesa. Akya kyamulengejile Yudasa kupata Yesu. Kabiji kasa kitwajijikatu na kuya. Akya kyalengejile buntushi kupata kya bumupashi, nobe byonka byajinga Kaina ku ntendekelo wapachile Abela, awa umo Lesa ye atambwile mulambo, kabiji ne kweseka kwi bonauna.

Nangwatu baesekele konauna bongozhi. Abo baesekele konauna bintu byonse, mambo kafwako nangwa kimo ne kanatu kichima. Akya kyatatwile mwi Kaina kabiji washinikishe mba kajinga kichima, kabiji kiji pamo neleelo jino uvwe mubiji (buntushi) ne bumupashi kwasambakana pamo. Kishinikisha

mba ke Satana, kechi kujipo jishinda jikwabo ne, mambo kichima kifuma kwi Satana. Kabiji kilengela kupashang'anya kya Bukine, muntu umo waeseka kupashang'anya kintu kimo kyabula kubiwa, abo kechi batongwelwa jimo kwingila ne. Binga abyoy atweba byotwamona mu ano moba apelako! Oo, amiwa, binga byavula byo!

⁹¹ Nanchi atweba twamona Lesa wikyuba akya-...kechi myaka ne myaka kupipula milanguluko Yanji pa Kyambo Kyanji kitanshi ne. Bino, awa Aye yeaita, ao iye Aye yeekajika. Kafwako nagwa umo mukwabo wafwainwa kwikala pakifulo kyanji ne. Kafwako nangwa umo watolele kifulo kya kwa Mosesa ne. Nangwa kyakubamba bavula baimene ba Kola, nangwa banga ba Datani; kyajingatu kyakwa Mosesa, Lesa wamwichile, nangwatu kikale byepi.

⁹² Bino, kabiji inge bantu kechi bakenda mwayila kyalumbuluka kyaswa muchima Wanji ne, Aye uji na kyaswa muchima wanji kyabula kulumbuluka akyo Aye kyo akemuswisha anweba kwendam. Monai, Aye wikiswisha, kijitu bulongo, pakuuba Aye ukeyyuba mambo a lukumo Lwanji, mu kyaswa muchima Wanji kyalumbuluka. Pano inge mwakonsha kutemwa...

⁹³ Nobe byonka byo kyajinga, ku ntendekelo, kechi kyajinga kyalumbuluka kyaswa muchima wa Lesa kya kusemwa baana pantanda kupichila mu masongola ne. Ine, mwane. Lesa walengele muntu kufuma ku lukungu lwa panshi, wapemejilemo muuya wa bumi mwi aye, kabiji waikela ke mweo wa bumi. Aye watolele kufuma kumwanamulume kwansho, kabiji ne kulenga ke mukazhaji. Akya kyajinga kya kwa Lesa kintashi kituntulu kyalumbuluka kyapa muchima wanji. Pakuuba bubi byo bwatwelele kabiji ne kuuba bintu byo bwaubile, nanchi Aye waswishishe mwanamulume kusongola mukazhi, kyafikilamo, kabiji waikala nabaana kwi aye. "Kunanuka kabiji ne kuyuzha ntanda, nanchi, inge abyoy imo mujishinda anweba momukobilanga." Bino, mwamona, kechi kyajinga kyaswa muchima Wanji kyalumbuluka ne.

⁹⁴ Onkao mambo, byonse bye bintu byajinga na ntendekelo byafwainwa kwikala na mpelo. Bonse bubi bwafwainwa kwiya kukonaikwa kukantampe. Bonse bubi bwafwainwa kufumapo. Onkao mambo, mukimye kikantampe kya Myaka kiumbi kimo kimye lusanguko byo lukafika, atweba kechi tukasemekewapo jibiji ku bashetu betu ne bamaama ne, bino nobe Lesa Aye byoekyubile kuntendekelo uka mwita muntu kufuma kulukungu lwa panshi, kabiji pamotu ne kwansho wanji. Abyoy ibyo. Abyoy ibyo Aye byaubile ku ntendekelo.

⁹⁵ Nanchi onkao mambo, Lesa kechi upipulapo milanguluko Yanji pa kintu kiji kyonse ne, bino Aye ukuswisha obewa kuya kulutwe. Pano, amwe kemwalepa bingi kuzhokoloka

pakuba mba mutolepo kika akyo Amiwa kyombena kwambapo kuno. Bino, kabiji, bino, kiji, obewa . . . Amiwa nasaka namba obewa wikyumvwishe. Mwamona? Lesa ukakuswisha obewa kubapo kintu kimo, kabiji ne kwimupesha mukuba byonkabyo, bino nangwa byonkabyo kechi kyo kyaswa muchima Wanji kyalumbuluka ne.

⁹⁶ Lesa waswishishe Isalela kutola muzhilo, mu Kulupuka kyapitala kyabu 19. Kimye bupe kyo ebapele kala ngauzhi, Mumbulungwa Wamujilo, awa mulambu wa mwanamukoko, bulume bwa kupokolola, bino abo bajijile kwikala na Muzhilo. Akya kechi kyajinga kyaswa muchima wa Lesa ne, bino kyaikajikilwe mambo muntu yewikikebele. Kabiji aye wafingilwe nayenkawa muzhilo ye akebele.

⁹⁷ Kyawaina kwikala na kyaswa muchima wakwa Lesa. Abyo ibyo Aye byo etubujile atweba. “Kyaswa muchima wenu kyubiwe. Bufumu Bwenu bufike. Kyaswa muchima wenu kyubiwe.” Atweba twafwainwa kwipana atweba bene ku kyaswa muchima Wanji ne Kyambo Kyanji. Kechi kwi Kipuzha ne. Kiketekele Akya. Kechi weseke kutana jishinda Jikwabo ne. Kisendetu byonka Byokiji mujishinda Jakyo.

Bavula bingi babena kukeba kuya, na kuzhokoloka mu jishinda jikwabo. Kabiji uvwe obewa wauba kyokyo, obewa ukatana mba obewamwine ubena kuyatu, obewa ukatana Mapesho akwa Lesa, bino obewa kasa ubena kwingijila mukyaswa muchima Wanji kyabula kulumbuluka kabiji kechi kyaswa muchima Wanji kyalumbuluka ne, kyaswa muchima kya Bulesa.

⁹⁸ Aye wikiswisha, nobe byonka abyo Amiwa naamba, bino Aye kechi—Aye kechi ukaswisha kwikala kyaswa muchima Wanji kyalumbuluka ne; bino Aye ukekilengela kyaingila na munema ne kwikipesha akya kyaswa muchima Wanji kyalumbuluka. Kabiji kusema baana, kupichila mumasongola, ke kimotu kyamukyokya.

⁹⁹ Pano monai, Moabu, mukya kutatwilapotu, kyajinga kyalo kyabula kwikajikwa mwayila mizhilo. Akyo kyatatwile byonkabya, kyabula kwikajikwa mwayila mizhilo, nangwa byonkabyo kyajinga na—na shabo waketekela ne mwana wamakazhi waketekela.

Byonka byokiji, inge anweba mwakonsha kupasha akya ne kwingijisha milanguluko yabumupashi, anweba mwakonsha kumona mba ke dinominesheni yaimana popa yabula kintu nangwa kiji kyonse. Kine. Mwamona, kyonsetu kintu kijitupamo kyaya mungi. Kabiji, talai, uvwe kyaletwa, kitatula nobe byobya, kyakonsha . . . Akya kwikala, nobe mbola wa jibebe, akyo kitatula nakwalumuka kasa kiyatu ne kuyatu ne kuyatu. Anweba mwatola kilubo kimo, kabiji ne kutatula pa kyokyo kilubo kimo, kabiji anweba mwatwajjikatu nakwalumuna akya

kintu kimo nejikwabo ne jikwabo, kabiji nekikwabo kimo nobe byonkabyatu, byonsetu pamo pafuma kikwabo ne kikwabo.

¹⁰⁰ Kabiji abyo ibyo kipwilo byo kyatatwile. Abo byo kyatatwile ku Nikeya, Loma, kimye kipwilo kya Katolika wa ku Loma... Akwa konka kuntendekelo, akwa ko kyafumine, kwajinga Pentekosito. Bino kimye kyobapangile kabungwe ne kuletamo bayukanikwa, monka mukipwilo, batatwiletu kulenga, kwikala na milombelo, kabiji ne kwingijisha malungo, ne—ne kulombelela bafwa, kabiji ne byonse bye bintu bikwabo. Kabiji pano kyatatwiletu na kupitang'ana, kufuma ku kilubo kimo ne kuya ku kikwabo, ke kilubo kimo kuya ku kikwabo, poso talai kwepi ko kyaya. Kechi kujipo nangwa umu wa kwimenako pentekositi ne, nangwa pachechetu ne. Mwamona? Ke kilubo kimo ke kitolepo kikwabo, kekitolepo kikwabo. Kujitu kintu kimo kyakuba, akyo ke, kuwamisha byonsetu kabiji ne kubwela jibiji kuntendekelo.

¹⁰¹ Kimye Martin Luther byo atatwile lubingisho... Akye kyafwainwa kwikila kipwilo kya Lutheran, kyayilako pa lutwe. Mwamona? Inge... Luther, kimye aye kyoajinga nakabungwe, aye kechi wasendele lubanji lwakwa Wesley lwakutokeshiwa, mambo aye wajinga wabukabungwe; kabiji bantu kechi baimene kulubaji lwakyokya ne, nanchi Mupashi wafuminepo.

¹⁰² Pano, jibumba ja kwa Lota; nangwa, Moabu wajinga mwaana wamukazhi wakwa Lota, wa mubukende kya kutatwilapotu. Pano monai, nobe kipwilo kya kumubiji, Moabu, waimenako dinominesheni wa kumubiji.

Isalela waimenako Kipwilo kya bumupashi. Isalela, akya kyajinga kipwilo kyakine, kyajinga musongwa wa joja juba, waichilwe kufuma mu Ijipita, kabiji ne kushinikisha kwikala bukine.

¹⁰³ Monai kimye abo, aba babiji baishile pamo. Bonse babiji bapaine mulambu umu, bonse babiji banshimikile, bamwene bitapisho sebeni, bonse babiji bapaine mulambo wawama, wa ng'ombe. Kabiji abo bapaine ne mikoko, mukushimuna amba kwajinga Mesiyasa ubena kwiya. Mwailatu ndonda, bonse babiji bajingatu pamo. Isalela, munshi mu kimpachiko; Moabu, peulu ya katumba. Kabiji Moabu na bitapisho sebeni; Isalela na bitapisho sebeni. Moabu naba ng'ombe sebeni; Isalela naba ng'ombe sebeni. Moabu na mikoko sebeni, kwamba pa kwiya kwa Mesiyasa; Isalela na mikoko sebeni.

Ny'anyi kintu kyapusene mwi abo? Ndonda yobaimenejilepo, bonse babiji bulongotu. Bino, mwamona, Moabu kechi bajinga na kushiniikisha kwa Lesa nabo ne; bajingatu kyaalo kimo, jibumba ja bantu bayukanikwatu. Bino Isalela wajinga na ngauzhi nabo. Bajinga na Jibwe ja kupumako nabo. Bajinga na Mumbulungwa wa Mujilo. Bajinga na muloolo

wa lubemba, wa lubuko. Bajinga na mapesho akwa Lesa kasa abena kwenda nabo, kabiji bajinga baana-baitwa na Lesa.

¹⁰⁴ Pano twatana kuuba mba akye kyajinga kipasha kyalumbuluka bingi mu bipwilo bya leelo. Nobe, Moabu kechi wajinga byobyoye ne. Isalela wajinga kang'enda, kufuma pa kifulo kimo ne kuya pa kikwabo; kuji konse kwayilenga Mumbulungwa wa Mujilo, ne abo bailenga nanji. Moabu, kechi wajinga nakyo ne; abo baikelenga monka mu madinominesheni, monka mu byalo byabo. Abo kechi baendelenga ne, abo baikelele ponkapa. Abo bajimaga nabantu babo bayukanikwa. Abo baikajikile bintu byonka byobyafwainwa kubiwa, kabiji bajinga na nzhita yabo yakondo, bajinga nabo bakulwa, abo bajinga na mfumu wabo yebajinga nanji, ako kobatambulanga mwakubila bintu byabo, kabiji ne bintu bikwabotu.

¹⁰⁵ Bino Moabu wamwene Isalela na kintu kimo kyo babujile kwikala nakyo. Abo bamwene bulume bukatampe mukachi ka Isalela, kabiji wajinga ngauzhi. Kabiji awa ngauzhi wajinga Mosesa. Kabiji abo bayukilenga uvwe kondo yaenda bibi, abo basutwilengatu maboko anji kabiji nekwiakwachijila peulu popa, kabiji nekondo yapipulwa. Nanchi abo kechi bajinga na byobyoye ne, nanchi abo baeseka kwikyesakanya na mapolitikisi, ne nakikoka kya mapolitikisi. Abo batumineko kuya mukyalo kikwabo ne kusenda ngauzhi kwiya konkakwa, nanchi abo amba bafwaijilwe kwikala na ngauzhi, kabiji ne kwikala na bulume mukachi kaabo byonka Isalela byo ajinga nabyo mukachi kabo.

¹⁰⁶ Bushe mwamona kupashang'anya kwa buntunshi? Mwakonsha kumona kipwilo kya buntunshi leelo? Akyo kijitu pamo.

¹⁰⁷ Monai, pano, bonse babiji bakekala na bangauzhi. Lupusanotu lumotu lwajingapo ke, Mosesa, ngauzhi wakwa Lesa, Mfumu wani wajinga Lesa. Apo ipo po atambwile mikambizho yanji, Kyambo kya Nkambo. Kabiji Balamu, ne aye, wajinga na mfumu, kabiji awa mfumu wajinga Balaka, mfumu wa Moabu, kabiji iko ko atambwile mikambizho yanji ne mapesho anji. Nanchi Moabu waambile kwi Balaka, "Iya kuno," nangwa Balamu, waambile mba, "iya kuno kabiji ufingileko amiwa abo bantu, mambo abo bakumbana ntanda yonsetu. Abo basakwiya kabiji ne konauna byonsetu nobe bang'ombe babena kuviya nsono." Waambile mba, "Iya kuno pano. Kabiji Amiwa nayuka mba obewa wakonsha kwibafinga, kabiji wakonsha kwi bapasha, kyonse kyoubu obewa kifikizhiwa."

¹⁰⁸ Bino, atweba twakeba kumona mba awe muntu wajinga ngauzhi watongwejilwe jimo kwi Lesa, bino aye wapotesha bubeji bwanji na mambo a bya mapolitikisi. Byonka byaubile kipwilo leelo jino, nobe byaubile Luther, Wesley, Pentekositi, ne jibumba jonse ja mwiabo, bapoteshe byonse mukuleta kikoka monka mukabungwe kabo. Mosesa, wajinga munshi yakwa

Lesa; Balamu, munshi ya Balaka. Nangwa byonkabyo, bonse babiji bangauzhi batelelwe-mba bakalume bakwa Lesa, kabiji bonse babiji bajinga ba bumupashi. Monai lupusano lujipo. Yense wajinga na mutwe: Mosesa wajinga Lesa, Balamu wajinga Balaka.

¹⁰⁹ Monai papo abwa bumupashi byobubiwa, mukushinikisha amba kumubiji kwa lubankana. Mosesa, watumina kwi Lesa, mwaila mwingilo waji, wasambakene ne kununushiwa na ngauzhi mukwabo wakwa Lesa. Ingilangulukaipotu anweba kyokyo! Mosesa, waichilwe na Lesa, watongwelwe jimo na Lesa, kasa aimana mu mwingilo wa Lesa; kasa abena kwenda monka mumashika, mujibumba jabantu, kabiji wanunushiwe na ngauzhi mukwabo wa Lesa, akya Lesa kyoapesha ne kwikajikwa. Wakonsha kubulang'ana byepi lupusano? Bonse babiji bajinga na bangauzhi. Lesa waambile ku bonse babiji bangauzhi.

¹¹⁰ Kabiji bamo baambile mba, "Lesa waambile mba, 'Ubai *kikye*.' Lesa waambile mba, 'Ubai *kyokya*.'" Pano, Amiwa kechi mbena kwipuzha kyokyo ne, bino akyo kyafuma mu ndonda ya Kyambo kya Lesa. Aye ngauzhi, nangwa kikale byepi inge aye ngauzhi, aye wafumine mundonda. Nanchi bantu bavula bajimbaikwa muyenkawa musango. "Oo, *awe* mulongo wakonsha kuuba *kikye*, kabiji *awe* mulongo wakonsha kuuba *kyokya*," kabiji wakana Kyambo?

¹¹¹ "Nangwa Amiwa ñaamba na jimi ya bantu ne ya bamalaika, nangwa Amiwa njina byabupe, abyo Amiwa nakonsha kwendesha mitumba, nangwa Amiwa napana bya bunoshi bwami na kujisha balanda, Amiwa kafwako kyo nji ne."

"Bavula bakeya kwi Amiwa mu joja juba, ne kwaamba mba, 'Nkambo, Nkambo, bushe kechi Amiwa naawilenga mu Jizhina Jenu nenyi? Kechi naubilenga, mu Jizhina Jenu, Amiwa nachi kechi napangijilemo bandemona ne kabiji naubile mingilo ya bulume?' Kabiji Amiwa kebambila mba, 'Mfumai papo, anweba... Mfumai papo kwi Amiwa, anweba bakuba bibi. Amiwa kechi ne muyukilepo anweba ne.'" Nangwa byonkabyo, abo baishile na kwisolola amba bekyuba, pakuuba Yesu waambile mba bajinga ba kuuba bibi. Nanchi bunguba bubu bobuka? Ke kintu kyo wayuka kuba, abyo ibyo kwikyuba, kabiji nangwa byokabyo kechi mwikyuba ne. Mwamona byo kikekala mu moba akumpelo?

¹¹² Umvwai aye ndonda yonse! Awa yewajinga mwingilo wami bufuku buno. Amiwa naambile mba Amiwa nakonsha kwikala pa naini koloko, bino Amiwa nsakufikako pacheche, kampepo. Talai, akyo kyajinga kyo kine kintu, kya kwimumweshwa anwe aye ndonda, kupichila mu Kyambo kya Lesa, mwamona, amba—mba Lesa wakonsheshe kulama Kyambo Kyanji pakuuba mba ekale ke Lesa.

¹¹³ Pano, atweba twamona mba bonse babiji bajinga bantu ba bumupashi, bonse babiji bajinga bangauzhi, bonse baichilwe. Kabiji Mosesa, monka mu ndonda ya mwingilo, na Mumbulungwa wa Mujilo wabukumo watangilengako kumeso anji pajuba pajuba, aye Mupashi wakwa Lesa pe aye, mu ndonda ya mwingilo. Awe wiya kalume mukwabo wakwa Lesa, waitwa na Lesa, watongwejlwe jimo na Lesa, ngauzhi ako kwi aye kwiya Kyambo kya Lesa. Apo popaji kyabulemo. Kafwako muntu nangwa umo wakonsheshe kwendeleka awa muntu amba wakwa Lesa—wa Lesa, mambo Baibolo waamba mba Mupashi wakwa Lesa waambile kwi aye, kabiji wajinga ngauzhi. Bino, mwamona, kimye kyo atambwile mukumbu wakine wafumine kwi Lesa, aye kechi Wakonsheshe kwi Kilama ne. Aye kechi wikimwene Akya ne, nanchi aye waile nakununusha Mosesa.

¹¹⁴ Pano, Balamu wamwene amba kyaswa muchima wakwa Lesa, na muchima wanji yense. Pano, kimye awe muntu mukatampe byo aishile ne kwaamba mba, “Balamu! Balaka mfumu watuma, amba obewa wiye lonka luno kabiji ufinge bantu bena Isalela, mambo abo bapalang’ejilemo mwaya ntanda, kabiji babena kungimena amiwa. Kabiji abo bazhokoloka bumfumu bonse, monsetu abo. Kabiji nanchi atweba twakemba mba obewa uyeko ne kwibafinga aba bantu. Mambo, Amiwa nayuka mba inge obewa wakonsha kufinga uji yense, aye wafingwa.” Pano, mwamona, aye wajinga muntu wakwa Lesa. “Kyo upesha obewa, ke kyapeshiwa.” Aye wajinga kalume wakwa Lesa.

¹¹⁵ Kabiji Balamu pano walangulukile mba, byo ajinga ngauzhi, “Kujitu kintu kimo akyo amiwa kyo nakonsha kuuba, kabiji ke kukeba kuyuka kyaswa muchima wa Lesa byo kiji.”

¹¹⁶ Ao ye mwingilo wa ngauzhi, inge waitwa kwikala ngauzhi. Kitanshi, ngauzhi wafwainwa kuuba byepi? Ke kukeba kyaswa muchima, ke Kyambo kya Lesa. Aye wafwainwa kwikyuba. Mambo, byoanji ngauzhi, ne Kyambo kya Lesa kiiya kwi aye. Aye...Baamba mba, “Kyawama, obewa kechi wi wafunda masukuulu amambo awama ne.” Kechi kyaambiwa mba mu Bainolo amba Kyambo kya Lesa ke kiya kubafunda masukulu amambo awama ne. Abo ibo balubankanya Akyo. Akya Kyambo kiiya kwi ngauzhi wakwa Lesa.

¹¹⁷ Kabiji papo paji muntu ao wajinga ngauzhi wakwa Lesa. Kabiji kimye kyobamupotele aye, kumupota, iya kuno kabiji nekwi bafinga bantu bakwabo bakwa Lesa, monai, aye waile na kukeba kyaswa muchima wakwa Lesa. Kabiji aye wakebelenga kuyuka kyaswa muchima Wanji kyalumbuluka, kabiji Lesa wamupele aye kyaswa muchima Wanji kyalumbuluka pa kyokya kintu. Kyaswa muchima wanji kyalumbuluka kyapainwe kwi aye. Kika kyajinga kyaswa muchima Wanji? “Kechi uye ne!” Akya kyo Kyambo kitanshi kyakwa Lesa. “Kechi wakonsha kuya

nabo ne. Kechi obewa weseke kulukuka bantu Bami ne, kwenda mu mashinda Ami alumbuluka.”

118 Nobe byokiji leelo, kukeba kuvwanga, kupachika, kabiji ne bintu byonse, inge bamona Mupashi wakwa Lesa kasa abena kwingila mukachi kenu. Kabiji abo beseka ku, abo baeseka myaka yavula, mukukeba mba Akya kibwele panshi. Bino monka mobayilako nakwikyendeleka Akyo, momo Akyo kiyilako nakubaya ne mukukoma. Obewa kechi wakonsha kufinga akya Lesa kyo apesha ne. Anweba kuuba mwikyuba ne. Anweba kuuba mwikyuba kya ne.

119 Nanchi, mwamona, aba bajinga bantu bakwa Lesa. Pano, awa ngauzhi, nagwa aye wajinga popa kabiji wapotelwe ku mfumu, waingijile mukachi kabayukanyikwa, kabiji ne bakwabotu. Kabiji Kyambo kya Lesa kyaishile kwi aye. Aye wakebelenga kyaswa muchima wakwa Lesa, kabiji ne kyaswa muchima wakwa Lesa kyo kya ambile kwi aye, kabiji waambile mba, “Kechi ukafinga babo bantu ne. Amiwa ne bapesha kala abo.”

120 Bino kechi kujipo wafunda byambo bya lesa pano pantanda wakonsha kukana iye Mbila yo tubena kusapwila ne, bino Akya kine ke Kyambo kya Lesa kya pa kimye kyakyo. Lesa washinikishiwa pa byonse byaambiwa ne kubiwa, Aye Wikishiniikisha amba Kiji bulongo. Pano, kechi kujipo umu wafunda masukuulu a mambo a Lesa, kafwako watanga Baibolo, kafwako ngauzhi, wakonsha kutala mu kyokya Kyambo ne, inge aye ye ngauzhi, aye ukamona kintutu kimo. Bino inge wabula kumona kintutu kimo ne, akyo kimweshatu mba pajipo kintu kimo kyatama. Mambo . . .

121 Mwaamba mba, “Kyawama, oo, Amiwa nakonsha kwikitola ne kwikyalwila mulubaji lukwabo.” Nanchi Balaki, Balamu. Mwamona? Bino Lesa watongwele Mosesa.

Kabiji nanchi kishinino kyajinga kika? Ke Kyambo kya Lesa. Kabiji aye wauwvine bulongotu, patokatu-bulongo kufukula kwa Lesa, “Kechi uye obewa ne. Kechi weseke ku—kufinga akyo Amiwa kyo napesha ne. Abo ke bantu Bami.”

Bino mwayuka kine kintu nyi? Balamu kechi wibakebelenga aba bantu ne, kya kutatwilapotu. Oo, kika . . . Baji baanga ba Balamu baji pantanda leelo! Aye kechi wakebelenga aja jibumba ne, mukyakutatwilapotu.

122 Pano, panyuma aye poatambwile kyaikajikwa-kyakufukula kwa Lesa, “Kechi uye ne,” bino, mwamona, mukifulo kya kwikyuba, kyajinga kintu kimo nobe Kaina, nobe Kola, aye wajinga na kichima, kabiji aye—aye wakebelenga ku, ene mambo akuyila, nangwa byonkabyo.

123 Monai, aye muzhi kata wama deninominesheni, panyuma yakutumwa jibiji kubwela, waambile mba “Ine, kechi muketekele mba Amiwa nkaya konka ne. Kechi muketekele mba

Amiwa nafwainwa kwikala na kintu kimo kyakwingila nabo ne. Amiwa kechi kapachika na boba bantu ne, mambo Lesa wambuujiile mba bantu Banji, kabiji kechi Amiwa naketekela mba Amiwa nkaya ne.” Inge waikele nakyokya!

Bino, mukachi ka muchima wanji, aye kechi wibatemenwe ne. Mwamona? Kechi bajinga ba mujibumba janji ne. Kabiji kintu kyonse kyabujile kwikala mu jibumba janji, “kechi kyajinga bulongo ne, kya kutatwilapotu.” Mwamona? Kabiji aye wibalengulwile, ne kwamba mba, “Kwajinga bintu bimo byatama byo baubile abe bantu. Kine Lesa wazhila ukafinge bantu ba yeo musango. Abo—abo ke bantu babula kufunda. Abo kechi bafunda nobe atweba ne. Atweba twi bantu bajimuka. Oo, baamba mba babena kwingijila Lesa, bino, talai pe abo, abo bobang’anyi? Ke jubumba ja, kika, ke jibumba jabazha, bakwi-kwijila, ako bena Ijipita kobanyemena konka. Kika, Lesa kechi ujipo na kyakuuba na jibumba ja ndochi jiji byobya ne!”

¹²⁴ Aye wakakelwe kumona aja Jibwe ja kupumako ne yewa muloolo wa lubemba, awa Mumbulungwa wa Mujilo. Aye waesekele kwibazhachisha mwaila maana abumuntu. Aye wankakelwe kumona alwa lwito lukantampe lwakwa Lesa. Monka mu lusa, monka mu kusalululwa, bajinga mu yewa ndonda, kabiji ne na Kyambo kya Lesa. Kabiji kimye aye kyo akebele kwibafinga, Lesa waambile mba, “Kechi wafwainwa kwikyuba ne. Bonse ke Bami. Balekaitu bunke bwabo. Kechi mwakonsha kwibakwata ne.”

¹²⁵ Pano, nanchi awa muntu waalulukile, ne kubwela kunyuma. Pano talai kumuzhikata wabo wa dinominesheni, nangwa byonkabyo, uvwe aye wabwela jibiji. Abo batumineko jibumba jikwabo jabongozhi bwabaya. Pa kino kimye bafwaijilwe kwikala bamo, kyalinga mba kwikaletu kutwajijika namuntutu, abo pano bajinga na madokotala bamichi mukyokya kimye. Bajinga ba mabishopu, nangwa kape mukulumpe wa pa kambi, bonse. . . Aye watumineko ji—ji—ji jibumba jawama, kabiji ji—ji jicheche jabongozhi jibumba, muntu umo wajinga nakufunda kucheche, kabiji aye wakonsha kutula muntachi wanji wawama nobe byobya, kyakonsha kulanguluka.

¹²⁶ Mwamona, abyo Kaina byobyoby aubile; aye walangulukile. Abo Kola byo aubile; aye walangulukile. Kechi aye walangulukile ne.

“Atweba tutaya panshi milanguluko yetu.” Atweba twaketekela Lesa, nangwatu kintu kikwabo kyaamba byepi. Atweba twaketekela Lesa. Atweba kechi tulatinguluka byaamba Lesa ne. Anweba kechi mwakonsha kulanguluka Nakyo ne. Anweba mwafwainwa kwi Kiswa kupichila mu lwitabilo. Kabiji kintu kyonse anweba kyo mwayuka, anweba kechi mwafwainwa kulanguluka kutwajijila ne. Amiwa kechi nayuka Aye byo oba ne; Amiwa naketekelatu Aye wikyuba. Amiwa kechi nayuka

Aye byo akalama yewa mulaye ne; bino Aye waambile mba Aye ukeyyuba. Amiwa nekiketekela. Amiwa ne kiswa mu musango ao Amiwa naketekela mba kyo Kyambo kya kwa Lesa.

Mwaamba mba, “Kyawama, kechi wakonsha kupichila mu kyokyo ne.” Amiwa kechi nayuka abyo Amiwa nakonsha kupwisha nakyo ne, bino Aye waambile mba, “Wikyambe.”

Amiwa navuluka kafunga wami wa ku Baptist wambujile, amba, “Kika, Billy, ukasapwilanga pa mashiki a kipwilo. Kika, walanguluka mba muntu uji yense wakonsha kumvwa kintu kyamusango yewa?”

Amiwa naambile mba, “Lesa ye waamba byoabyo.”

“Kana anweba muke kyuba byepi, na wafundatu kupelela mu gulendi-sebeni, kulombelela ba mamfumu, kabiji ne kusapwila kuzhokoloka ntanda yonse?”

¹²⁷ Amiwa naambile mba, “Amiwa kechi nayuka Amiwa byo nkooba ne, bino, Aye waambile byoabyo, kabiji akya kyakila kwakama bingi kwi amiwa.” Mwamona? “Aye waambile byoabyo. Amiwa kechi nayuka byo kisakubiwa ne.”

Aye waambile mba, “Bushe obewa walanguluka bantu mukikye kikantampe, ntanda yabafunda mba obewa ukeimena nabyobaimanapo, pa yiwe mutwe wa lubuko lwa Bulesa ne bikwabotu, mwaketekela mba bakonsha kuketekela kyokyo nyi?”

¹²⁸ Amiwa naambile mba, “Kechi kyo kyami kya kuyuka kana bakonsha kwikiketekela Akya nangwa ine.” Amiwa naambile mba, “Mwingilo wami ke Kwikisapwila. Abyo Aye byoabyo ambujile. Aye waambile mba Aye ukekala ne amiwa, kabiji Aye wambujile byo kikobiwa.”

Kabiji kyaubiwa monka mo ambijile Aye mba byo kikobiwa. “Kitanshi, tolai maboko abo; apo po kikeya kufikizhiwa mba ukayuka milanguluko ya mumichima yabo yafyamika.” Kabiji Amiwa ne mubuula pa kikye, kabiji kyamwekele byonkabya. Kyubiwa byepi? Amiwa nangwa byonkabyo kechi nayuka byokyubiwa ne. Akyo kechi lubaji lwami lwakuyuka byokyaafwainwa kubiwa ne; kyaubiwatu.

¹²⁹ Ng’anyi wakonsheshe kulondolola kimye Lesa kyo ambijile Elaija, “Yanga kokwa kabiji ukekale ku muntumba, kabiji Amiwa nkakujisha obewa. Amiwa nanengezha bi—bi kwangala kukujisha obewa”? Bushe kikwangala kyakonsha kusenda byepi kibese kyashinkwa kabiji kibese—kibese kya jisabi, banengezha, kabiji ne kuleta ku ngauzhi? Akyo kyakila pa kintu kiji kyonse akyo Amiwa kyonakonsha kulondolola. Amiwa kechi ndanguluka mba wakonsha, nangwa muntu uji yense wakonsha ne. Bino Aye wikyubile. Abyo byo byonka byajinga byafwainwa. Aye wikyubile, kabiji abo bo bukine bwa kikye.

Aye byo ekyubile, Amiwa kechi nayuka ne; kechi mwingilo wami ne. Bino Aye wikyubile. Abyo Aye byoalengele ntanda, Amiwa kechi nayuka ne; bino Aye wikyubile. Byo Atumine Mwaana Wanji, Amiwa kechi nayuka ne; bino Aye wikyubile. Nga Aye byo asangukile kufuma kubafwa, Amiwa kechi nayuka ne; bino Aye wikyubile. Nga Aye wampulusha byeepi amiwa? Amiwa kechi nayuka ne; bino Aye wikyubile. Abyo ibyo. Pano Aye wimupulusha byepi anweba? Amiwa kuuba ne mubula anweba ne; bino Aye wikyubile. Nga Aye wambukile byepi amiwa? Amiwa kechi nayuka ne; bino Aye wikyubile. Aye walaile mba Amiwa kekyuba, kabiji Aye ulama Kyambo Kyanji.

Bino, Balamu wafwaijilwe kuyuka kyokyo, kabiji aye wayukile bulongo.

¹³⁰ Monai, akye kyawama, jibumba jabongozhi, kwiya, kabiji kika kyawama? Abo bajinga na byabupe byawama. Kabiji kechi kyonka kyotu ne, abo bakonsheshe kumupa mali avula, kabiji bakonsheshe, kumupa aye kifulo kyawama. “Pano, kufumyako wamwingilo mu kabungwe, atweba tusa kulengela kwikala mukulumpe wa pa kambi. Mwamona? Amba, atweba tu— atweba tusa kubapo kintu kimo kwi anweba inge mwakonsha kufumyapo aja jibumba ja bantu kokwa, monai, kabiji ne kwikileka.” Oo, bamupele aye kifulo kikatampe bingi. Waambile mba, “Monka mwaila kupesha pabaya. . .” Waambile mba, “Mwayukatu, Amiwa nakonsha kukusuntula obewa.” Talai ko abena kutambula byambo byanji kufuma, mutwe wa kyaalo.

¹³¹ Kwepi Mosesa ko afumishenga Byambo byanji? Aye Mfumu wa Mwiulu. Umo wajinga Kyambo kya mulaye wakwa Lesa, “Amiwa ke mutwala ku ntanda ya mulaye, kabiji kafwako muntu nangwa umo ukakwimena obewa ne. Amiwa katuma nyuki kulutwe yenu kabiji ikafumyamo byonse, kufuma kukilujo ne kukipiko. Kabiji anweba mukangata yoya ntanda. Amiwa yo nalaya-. . . Amiwa ne kipana kala kwi anweba. Yainga, katambulai, ke yenu; ke yenu.” Kabiji pano, mwamona, abyoo Ibyo Mosesa ye atelekelengako. Kabiji awe muntu watelekelenga poso waiya ku kintu kimo mu muchima wanji mwine wajinga wa kichima, kabiji nanchi pano wayile ku mutwe wanji wa busapwishi. Mwamona?

¹³² Monai, kifulo kyawama. Aye waambile mba, “Mwayukatu Amiwa nakonsha kukusuntula obewa? Amiwa nkakusuntula obewa pakifulo kyawama. Amiwa kukubila byavula obewa. Amiwa kananuna nsabo yobe. Amiwa nkakupa fweto yawama bingi.” Kabiji aye byo amupele byonse bye, wamupofwele meso anji.

¹³³ Baanga ba Balamu baji pantanda leelo, kuuba mba, kupichila mu kifulo kyawama, kipwilo kyawama, mulaye wa kintu kimo! Uvwe muntu washinkula meeso anji pa Kyambo kabiji ne kwingila kwa Lesa. . . Kabiji awa muntu wawama, ao

uji na bongozhi, ukatatula nobe kalume wakwa Lesa, kabiji aye ukekala na jibumba jawama. Pakupitapo kimye kicheche, lubatizhilo lwa Mupashi Wazhila lwapanwa kwi aye; lubatizhilo mwi Yesu mu Jizhina jaletwa kwi aye, akyo ke Kinembelo kabiji jishindatu jimo ja Binembelo ja ku batizhamo. Kabiji uvwe kyapanwa kwi aye, kabiji ne dinominesheni yayuka mba aye byo atatula bibye abo bakashindwa uvwe aye watatula byobya, abo bamupa kifulo kyawama ne lupimpu lwa mu kipwilo. Mwamona, musango wakala wakwa Balamu, nejikwabo, byonka byokyajinga kuntendekelo yabintu.

¹³⁴ Pano, awa muntu utaanga Baibolo, aye kechi wakonsha Kwikitanga ne kanatu wamona mba abwe bo Bukine. Kechi kuji muntu nangwa umo wabatizhilwe mu bifulo bya “Taata, Mwaana, Mupashi Wazhila ne.” Ke lufunjisho lwa ba Katolika kabiji kechi ke Lufunjisho lwa mu Baibolo ne. Kafwako muntu mu Baibolo wabatizhiwe, nangwa myaka fili anduleendi panyuma yakufwa mutumwa wapeleleko ne, bino kika kya batizhiwe mu Jizhina ja Yesu Kilishitu. Kipwilo kya Katolika kyatatwile kyokyo, kabiji ne bonsetu bashala baishile kukyonka kya. Kabiji wamwingilo yense waikala mu kufunda kwanji kabiji watala pa kyokyo, wayuka mba abo bo Bukine, bino na kuyukanyikwa, ke kwikala aye pa kifulo, milanguluko yawama mukachi ka bantu, aye kekunekenya.

“Kyawama,” mwaamba mba, “Lesa wamupesheshe.”

¹³⁵ Kyakine, bamo baji na byabupe bya lubuko, bamo baji na kipekenyi kyabaya bingi. Kabiji abya byonse byazhikile pameso abo, kabiji basenda mukumbu umo kufuma mu Kyambo kya Lesa kuuba mba obewa nangwa muntu mukwabo wakonsha kutambula; Lesa kechi upimpula ne. Mwamona amo Amiwa monekitazha nyi?

¹³⁶ Balamu, namambo a kifulo kyawama, aye walangulukile. Pano talai, uvwe aja jibumba jawama jabwela jibiji, akya kijitu bulongo. . . Balamu, kuno, watole byambo byanembwa mufoni. Mwamona? Aye waambile mba. . . Aja—aja jibumba jawama jabwela jibiji, aye—aye wafwaijilwe kwamba mba, “Fumamo mu kyeenyi kyami! Amiwa ne mubuula Kyambo kya Lesa. Yanga! Akye ke ABYO BYOBYAAMBA AYE NKAMBO.” Bino, mwamona, bya bupe, ne kwikala muntu wayukanyikwa bingi!

¹³⁷ Oo, abyo byobyoby batemwe kuba kyokyo! “Atweba tubena kukutuma obewa kuntanda. Atweba tukakupa obewa ndeke yawamisha. Tusa kutundaika mbung’eno yenu konse inge mwakonshatu. . .” Oo, ine. Uu-uu. Mwamona?

Atweba twayuka byaamba Kyambo. Atweba twayuka byaambile Lesa. Atweba tukekala na kyokyo, monka mu bukwasho bwa Lesa. Mwamona? Nangwa kikale kyabyepi kya yewa musango wa mulaye, kabiji nangwa mwakonsha kupana byavula byepi, kabiji banga baji *bibye*, *byobya*, nangwa ku

mukwabo anweba mwakonsha—anweba mwakonsha kuleta; atweba tubena kukeba ABYO BYOBYAAMBA AYE NKAMBO, kabiji ne Aye byo ambile *Papo* patanshi.

“Kyawama, kipwilo kyaambile mba, ‘Akyo ke kya bubiji.’”

Atweba tubena kukeba byaambile Lesa pa ntendekelo. “Kabiji kintu kyonse kyanungwako kwi Akyo nangwa kufumyako ku Akyo ne, kabiji jizhina jobe jikafumishiwamo mu Buuku wa Bumi; mu kubikapo kyambo kimo kwi Akyo, nangwa kufumyako Kyambo kimo ku Kikyē.” Atweba tubena kukeba Aye byo aambile; kechi kyokya kyaamba kipwilo ne, kika Dokotala Jones kyo aambile, muntu mukwabo byo aambile. Atweba tubena kukeba abyo BYOBYAAMBA AYE NKAMBO, byaambile Kyambo.

¹³⁸ Bino pano atweba twatana mba Balamu, kalume wakwa Lesa. Kabiji bavula bamuboba bantu batatwile, kabiji bonse bajinga baikajikwa bakwa Lesa, kabiji Kyambo kya Lesa kyaambile byavula bintu; pakuuba inge kyafika pafikizhiwa bya Bukine bonse, abo kechi bakonsha kwikyuba ne.

¹³⁹ Monai papo, nobe ngauzhi wakwa Lesa, aye kechi wafwanijilwe kukwachiwa mujoja jibumba jiji byobya ne, kya kutatwilapotu. Aye inge kechi waile nabo ne. Bino, talai, nambo a kuyukanyikwa, mwamona, na mambo a buyuke bwa bumuntu bwani, aye waambile mba, “Kyawama, kwikala bufuku bonse, kabiji Amiwa nsakweseka ne jikwabo.” Mwamona, “Amiwa nsakweseka jibiji”? Kika kyo ubena kukeba kweseka jibiji?

¹⁴⁰ Lesa wamubujile kala bya kwamba. Lesa waambile mba, “Babule amba kechi ubena kuya ne.” Akyo kyo Kyambo Kyanji kitanshi. “Amiwa kechi mbena kuya ne. ‘Kabiji kechi uye ne. Obewa kechi ufinge abyo Amiwa byo napesha ne.’” Pano monai byo kyamwalukjile aye, pa kakimye kacheche. Mwamona? Kabiji byo kikobiwa, kimye kyonse. Inge Lesa waamba kiji kyonse, Aye wikitabizha. Aye kechi upimpula milanguluko Yanji pa kintu ne. Aye wikala bulongo na Kyambo Kyanji. Nangwatu muntu mukwabo ambe byepi, Aye wikala na Kyambo.

¹⁴¹ Pano, Balamu wakonsheshe kuyuka bulongo. Aye wakonsheshe kwifumyako aye mwine kufuma kujoja jibumba. Bino bonsetu boba byabupe byawama ne mulaye wa yiwe mfumu, waambile mba, “Mwayukatu Amiwa nakonsha kwikyuba. Amiwa ne bishopu. Amiwa nakonsha kuuba kyonse akyo Amiwa kyo mbena kukeba kuuba, kabiji Amiwa nkemulaya inge anweba mwakonsha kwiya na kwikyuba.”

Kabiji Lesa wamubujile mba, “Kuuba kyokyo ne.”

¹⁴² Bino nangwa byonkabyo Balamu waambile mba, “Anweba, mwikala bufuku bonse, kabiji Amiwa—Amiwa nsakweseka jibiji.”

Mwamona, aye wajinga na Kyambo. Anweba kechi mwakonsha kupachika pa Kikye ne. Lesa wikyuba waambile byobyoy. Na jibumba jiji byobya, kimye kyonse kyambatu kwi obewa kufuma mu kyaswa muchima wakwa Lesa, inge wakonsha kwibaleka abo.

¹⁴³ Kwajingatu jibumba jimo ja kwiya kwi ngauzhi, kimye kimo, jatelwa mba Yoba. Abo kechi bakonsheshe kwisamba nanji ne. Aye wamwene kimwesho. Aye wayukile biji bulongo.

Balamu wamwene kimwesho, kabiji nangwa byonkabyo kechi waikejile ku Kukyokya ne.

¹⁴⁴ Nangwa mabumba a kipwilo avule byepi, “Oo, Yoba, wafwainwa kuuba *kikye*, wafwainwa kuuba *kyokya*.” Ne mukazhi wanji, waambile mba, “Obewa ubena kwamba nobe muntu wabula maana.” Mwamona? “Amiwa nayuka byaambile Nkambo. Amiwa nayuka akyo Aye kyo akebelenga, kabiji abyo ibyo Amiwa byonauba.” Mwamona, aye waikele na kyokya Lesa kyo amubuujile.

¹⁴⁵ Monai, Balamu kwingijisha mwayila milanguluko ya buntushi. Mwamona? Aye waambile mba, “Kyawama, Amiwa—Amiwa natana kuuba mba. Amiwa keseka jibiji.” Pano, apo ipo po mwakonsha kwiya, mu jishinda ja bubiji. Baanga ba Balamu bo tuji nabo bufuku buno, abo bakeba kwingijisha mutwe wa Mateyo 28:19 na mambotu a milanguluko yabo? Baanga babena kukeba kwingijisha Malakai 4 na mambotu a milanguluko yabo yabumuntu? Baanga babena kukeba kwingijisha Luka 17:30 pa mambotu a milanguluko yabo yabumuntu? Baanga babena kukeba kwingijisha bibye bintu, nangwa byonkabyo, “Kyawama, Amiwa nemubula, Amiwa—Amiwa naketekela mba byonse byamvwangakanatu na Kyokyo”?

¹⁴⁶ Kabiji pano papo popajinga Balamu waesekelenga kwaamba mba, “Kampepo Lesa wamvwangakenye. Amiwa nsakweseka ne jikwabo, mwamona, mwamona ibyo Aye byoambile.” Pano, Aye wayuka muchima obe. Monai, Balaamu waingijishe yiwe sabwakya wabubela wakumwenamo milanguluko yanji, mambo, kine, aye wakebelenga aa mali. Aye wakebelenga yewa munema. Aye wakebelenga kyokya. Aye wakebelenga yewa mwingilo. Aye wakebelenga akya kifulo, kya kumwikajika po, nobe Dokotala *kananga-ne-kananga*. Nanchi aye—aye—aye waambile mba, “Amiwa nsakweseka jibiji.”

¹⁴⁷ Oo, ku ba Balamu mu ntanda bufuku buno, kulaiwa bifulo, kuyukanyikwa! Oo, amiwa! Bazhindamika milanguluko yabo nabyobya. Mambo a madinominesheni abo, abo baambile mba, “Inge wauba *kyokyo*, yanga. Amiwa nayuka mba obewa wi muntu wawama, kabiji twakutemwa,” kabiji aye ke muntu wawama, “atweba twamutemwa. Bino kuuba wasapwila kyokyo ne. Lwetu—lwetu lufunjisho lwaamba mba kechi wakonsha kuuba kyokyo ne. Dokotala *Kananga-ne-kananga* waambile

mba abye byo kiji. Pano wafwainwa kwikiketekela muyiwe musango, inge waikala ne atweba. Pano, inge mubena kukeba, Amiwa nayuka mba muji na kimye kyakosa bingi, kyawama, Amiwa nsakumona kana Amiwa nakonsha kwimusuntula, kampepo ne kupimpula bipwilo.” Oo, anweba Balamu! Inge mwayuka kyaswa muchima wa Lesa, mwikyuba! Lesa kechi ukapimpulapo milanguluko Yanji ne. Ine.

¹⁴⁸ Kintu kimo kyo akonsha kupita, kya Bukine, kuuba mwingilo wanji. Aye waambile mba, “Kyawama, Amiwa—Amiwa nsakweseka jibiji.” Monai ba Balamu bajiko.

¹⁴⁹ Nanchi pano vulukai, byo aishile bufuku bwa bubiji, nababo bakantampe bayukanyikwa, kasa aye anji na milanguluko yashinka kabiji yapofoka, Lesa mulekai ayenga aye. Pano, Lesa kechi wapipwilepo milanguluko Yanji ne, bino Aye wamupele kyaswa muchima Wanji kyabula kulumbuluka. “Yanga kulutwe nanchi.” Bino wataine mba kechi kyakonshakele kwingila ne.

¹⁵⁰ Lesa wayukile kyajinga mu muchima wakwa Balamu. Nangwatu wajinga ngauzhi, Aye wayukile mba wibanshikilwe booba kyongo-kyazhila, kabiji aye—kabiji aye waubiletu... aye—aye wakebelenga kwibafinga, nangwatu byonkabyo. Kabiji Lesa wamubuujile mba kechi wakonsha kwikyuba ne, bino nangwa byonkabyo aye wayishile, na kukeba kwikyuba, ne jikwabo, nanchi Lesa wamulekele kuya kulutwe. Lesa waambile mba, “Yangatu kulutwe.” Pano, vulukai, Aye kechi wapimpwilepo milanguluko Yanji ne.

¹⁵¹ Monai, kyajinga kukeba kwanji kwibafinga. Aba bantu boabikiletu amba babyamakayotu, aye wakebele amba ebafinge. Aye wakebelenga kifulo. Aye kechi wakebelenga kwikosamika nabo ne, nanchi aye walangulukile mba inge wakonsha kuuba kikye kyubilo kicheche ku mfumu, nanchi aye ukasuntulwa. Lesa kechi wakingile milanguluko Yanji nangwa Kyambo Kyanji ne.

Bino Aye ukemupa kukabila kwa muchima wanji, kwa muchima wenu. Aye walaile kyokyo. Mwayuka kyokyo nyi? Aye walaile kwimupa kukabila kwa muchima wenu. Kabiji lekai kukabila kwenu kwikale Kyambo kya Lesa. Lekai nkebelo yenu ikale ke kyaswa muchima Wanji, kechi kyaswa muchima wenu anweba bene ne. Kyaswa muchima wanji! Inge Aye... Anweba mwamwipuzha kintu kimo, Aye kechi wikipana kwi anweba ne, ambai mba, “Nemusachila Anweba, Nkambo. Anweba mwayuka kyawama.”

¹⁵² Monai Mfumu Hezekiya, kimye Aye watumine awa ngauzhi kokwa kwi aye, Lesa wikyubile, ne kwamba mba, “Bikai nzubo yenu mu ndoonda. Anweba musakufwa.”

Hezekiya waalwile kilungi kyanji ku kibumba kabiji wajijile bingi, kabiji waambile mba, “Nkambo Lesa, Amiwa—Amiwa nalomba mba Anweba mulangulukepo pe ami. Amiwa naenda

ku meso Enu na muchima walumbuluka. Amiwa nakeba mba Anweba mundeke amiwa kwikala na bumi myaka fiftiini.”

¹⁵³ “Kijitu bulongo.” Lesa waambile ku ngauzhi, amba, “Bwela kunyuma na kumubuula mba Amiwa namumva aye.”

Kabiji aye waubile byepi? Aye waletele kyabuvu ku kyaalo kyonse. Aye wavundumwine bukaji bwakwa Lesa poso Aye pobamwipaile aye. Abyo ibyo. Mwayuka kyokyo. Wabwela panyuma kwi Lesa. Kyafwaijilwe kwikala bingi bulongo, kufuma mu kyaalo, mfumu, ne bonsetu, inge wayile kulutwe na kusenda kintu kitanshi kyakwa Lesa kwi aye.

Bino kyamwekele kyakosa pa ngauzhi, kimye ngauzhi kyo abwelele na kwamba Kyambo kya Lesa kwi aye, panyuma yakuba kikye kamubule aye. Bino Lesa waambile mba, “Yangatu kulutwe.” Bino, mwamona, kyaletete kyabuvu.

¹⁵⁴ Kika kyo aubile Balamu? Panyuma ya kuyuka kyaswa muchima wa Lesa, kabiji nangwa byonkabyo waubile lupata, aye ukeyyuba, nangwa byonkabyo. Kabiji kyaubile byepi? Monai. Aye kechi wapimpwilepo milanguluko Yanji ne. Aye wayukile biji mu muchima wanji.

¹⁵⁵ Mwayukatu, Thomas, kimye kimo kechi waketekejile kyokyo ne. Ine, aye—aye waambile mba, “Ine, kechi Amiwa nakonsha kuketekela kyokyo ne. Inge Amiwa nakonsha kutola kuboko kwami ne kwi kutumpamo mu lubaji Lwanji, ne kwikibika mu misumali ya mu maboko Anji, kyawama, nanchi, Amiwa—Amiwa nsakwikitabila pano.”

Aye waambile mba, “Iyai kuno, Thomas. Mwamona? Pano bikai maboko enu muno.”

Pano, oo, Thomas waambile mba, “Ke Nkambo yami kabiji ne Lesa wami.”

¹⁵⁶ Waambile mba, “Ee, mwamona, kabiji pano wikiketekela. Kekylla bukata bwakilambu kyenu, anweba mwabula kumona kabiji pano mweketekela!”

Bantu kimye kimo kechi bakonsha kutambula Mupashi Wazhila ne kanatu baamba na jimi. Amiwa naketekela kwamba mu njimi, kinetu. Aye ye Lesa wawama; Aye ukemupa nkebelo ya muchima obe. Bino nangwatu wambe byepi munjimi, kabiji ne kukana kikye Kyambo, waya mungi nangwa byonkabyo. Mwamona? Mwamona, kechi anweba mutwelamo nakwamba munjimi ne. Anweba mutwelamo nakulama Kyambo kyonse. Abo bo bukamonyi bwa Mupashi Wazhila, inge waketekela Kyambo kya Lesa. Mwamona?

¹⁵⁷ Amiwa naketekela mu kwamba munjimi. Amiwa naketekela mba mwakonsha kwikala basangululwa, nobe abyo Amiwa najikwamba lukeelo luno, poso waamba na njimi ipya. Amiwa njinabo, amiwa mwine, kabiji Amiwa nayuka mba ke kya Bukine. Amiwa nayuka mba kyakine. Bino akyo kechi kyo

kiyukilo ne, obewa, amba obewa wi mwaana wakwa Lesa wasalululwa. Mwamona? Ine, kinekine. Aye kechi waambile mba. . .

“Bavula bakeya kwi Amiwa ne kwaamba mba, ‘Nkambo, kechi Amiwa naawilenga kabiji naubile byonse bye bintu bikatampe mu Jizhina Jenu nenyi?’ Aye ukamba mba, ‘Mfumai kwi Amiwa, anweba bakuba bubu, Amiwa kechi ne muyukile ne.’”

¹⁵⁸ Anweba mwaamba na njimi kabiji ne kukana kubatizhiwa mu Jizhina ja Yesu Kilishitu? Kintu kimo kyatama kuntu kumo. Ee, kine; byonse byo bintu, yonse mikambizho Lesa yo apana. Pajipo kintu kimo kyatama. Esekaitu kupesapesa anweba mwaila milanguluko yenu yabumuntu, kabiji mumone akya—mumone akya Baibolo byoaambile. Mwashaiko pantu pamo apo muntu umo po abatizhilwe mu jizhina ja “Taata, Mwaana, Mupashi Wazhila.” Mwamona? Kechi mokiji ne. Bino, mwamona, kimye kimo na mambo a milanguluko yobe yabumuntu, mwaamba mba, “Kyawama. . .”

Anweba mwaamba mba, “Lesa waambile ku banabakazhi byo bafwainwa kuuba, kechi kumvwala tuputula ne bintu bikwabo ne, bino, mwayukatu, kafunga waambile mba. . .” Nanchi abo baya mu ndoonda yapeela.

¹⁵⁹ Abo bayuka Lesa byo aambile pa kikye Papo. Mwamona? Kine, Lesa byo aambile nanchi.

Nanchi abo—abo—abo bakeba kwikyuba, nangwa byonkabyo, mwamona. Abo beseka kutana mwakubepela. “Kyawama, Amiwa nalanguluka mba akyo kijitu bulongo. Kechi—kechi kiji. . . Mwela kupupa ne. . .” Ee.

Bino Lesa wabuujile mwanamulume mba kuvwala byapusanako na mwanamukazhi. “Inge mwanamukazhi wamvwala kya kumvwala kyapashako kya mwanamulume, kyajinga kyabunya ku meso Anji.” Nanchi kechi kiji bulongo ne, ee, kabiji kechi wafwainwa kwikyuba ne. Ine. Mwamona? Nanchi, onkao mambo, ke kintu kyatama.

¹⁶⁰ Bino, mwamona, beseka kutana mwakubepela, amba, “Aye Nkambo wambujile kuuba kikye.” Amiwa kechi naamba mba Aye kechi wabuujile kuba ne, bino, talai, akya kechi kyajinga kyaswa muchima Wanji kyalumbuluka ne. Akya ke kyaswa muchima Wanji kyabula kulumbuluka. Mwamona akya byokyaubilwe? Akya kisakulubankanya jibumba jonse. Akya kisa kulubankanya kije kyonse.

¹⁶¹ Monai papo, Lesa kechi wapipwilepo milanguluko Yanji, Kyambo Kyanji ne. Bino Aye ye Lesa wawama, kabiji Aye ukakupa nkebelo ya muchima obe, nangwa byokabyo akya kyaimena kyaswa muchima Wanji. Anweba mwaketekela kyokyo nyi?

Talai, Lesa wabuujiile Mosesa mba, “Obewa yanga kokwa,” awe ngauzhi washingwa manyi. Waambile mba, “Yanga ukambe ku joja jibwe.” Aja japuminweko kala.

¹⁶² Mosesa waile kookwa na bukaji bwanji, watolele kamama, kabiji waambile mba, “Anweba basantuki, nanch atweba kechi twakonsha kutapula meema kufuma kujije jibwe nenyi?” kabiji wapumiko ku jibwe. Ne meema kechi amwekele ne. Aye wapumineko jibiji; meema ayishile. Akya kyajinga kyaimena kyaswa muchima wakwa Lesa. Akya kyaonawine mutanchi yense mu Baibolo; Kilishitu wapuminweko jikwabo ja bubiji. Mwamona? Kilishitu wapuminwe jimo. Akya kyaonawine muntachi yense. Bino Aye wamupele kyaswa muchima Wanji kyabula kulumbuluka. Nanchi, panyuma, aye waambile mba, “Monai, tuji na meema enu. Ee, Amiwa nemuletela anweba, anweba jibumba jabansatuki!”

¹⁶³ Lesa waambile mba, “Iya kuno, Mosesa. Iya kuno. Iya kuno peulu. . . Obewa waikala ke kalume wakishinka.” (Nobe mwanamukazhi uji na masapato alepa, “Obewa kanjila,” wamona.) “Talai kubushiya. Wamona ntanda ya mulaye?”

“O Nkambo!”

“Bino obewa kechi ubena kuyamo ne. obewa wasendele Mashinda Ami kechi mukyaswa muchima kyalumbuluka, ponka pano pa Jibwe. Obewa witumbijika obewa mwine, mwamona, kabiji kechi Amiwa ne. Obewa witokeshe obewa mwine. Obewa kechi watokesha Amiwa ne. Obewa kechi walamine Kyambo Kyami kitutulu ne, byonka byo Amiwa nakubujile mba ube ne.” Nangwa byonkabyo, meema aletelwe.

Obewa wakonsha kubika maboko pa bakolwa kabiji bakakosa. Obewa wakonsha kwaula, nangwa kwamba na njimi. Bino, kine kintu ke kino, lama Kyambo Kyanji kitanshi! Lesa kechi upimpula milanguluko Yanji ne, mulunda. Obewa wafwainwa kulama mwingilo Wanji, kyaswa muchima Wanji.

“Oo, kyawama, akyo kyajinga kya banababwanga.”

¹⁶⁴ Aye kechi ukingya ne. Inge Aye ukiji na banababwanga, awa ye mwingilo umo. “Yainga panopantanda ponse na kusapwila Mambo a wama. Abye biyukilo bikebalondelanga baitabila.” Kechi kipimpulwa ne. Aye kechi wakonsha kupimpula ne.

Bino, anweba mwakonsha kwamba mba, “Kyawama, Amiwa nemubula, kechi ke bya mujino juba ne.” Oo, anweba bena Balamu! Mwamona? Mwamona, Lesa kechi ukingya ne. Aye ujitu pamo keesha, leelo, ne myaka yonse.

¹⁶⁵ Ingi talaitu anweba kubena Balamu baleelo jino. “Oo, Amiwa nayuka mba, mu Baibolo ba batizhilwe mu Jizhina ja Yesu, bino, talai, bantu bonse. . .”

Amiwa kechi natako muchima bantu byo bauba ne. “Kechi kujipo Jizhina jikwabo mushi ya Mwiulu japewa ku bantu mo

mwakonsha kupulukila ne.” “Kechi pajipo lulekelo lwa mambo ne, kanatu kupichila mu Jizhina ja Yesu Kilishitu.” Kika, byo muji bawama, byo mwafwainwa kuuba, akyo kechi kijipo na kintu kimo kyakwingila nakyo ne. Ke Kyambo kya Lesa kitanshi; obewa wafwainwa kwikala Nakyo. Yii! Kijitu bulongo.

¹⁶⁶ “Lukokelo ku Kyambo Kyanji byawama kukila mulambo.” Anweba vulukai kyokya kimye Saulo kyo abwelele.

¹⁶⁷ Balamu wajinga na kya bupe kya lwitabilo kabiji wakonsheshe kwingijisha mwalumbuluka, na kintashi kituntulu Kyambo kyakwa Lesa.

Bantu bavula mu mwingilo leelo, na bya bupe bya lubuko, bakonsha kuuba kintu kimo. Bantu bavula baji muno, bantu babena kwamba na njimi, bantu babena kwaula, kyabupe, kyakonsha kwingijishiwa mu Bufumu bwa Lesa, bino kechi be kyuba ne. Abo basenda... Kabiji Lesa wibapesha, nangwabyonkabyo, ke kubila mwaila kyaswa muchima wanji kyabula kulumbuluka. Pakuuba kuyukanyikwa, ne byakisangajimbwe, nekumwenamo kwa bumuntu, bapotesha bubeji bwabo, nobe byaubile Isao, mwamona, wapoteshe ku kabungwe. Wapotesha, nobe byaubile Balamu. Mwamona?

Nanchi bavula babena kuuba leelo kintutu kimo. Twayuka mba abyo ibyo. Bapotesha bubeji bwabo. Uu! Banabakazhi kwaula amba Mupashi Wazhila, bamvwala tuputula; banabalume bebaleka mu mapupiti, banabakazhi baji-nasuki yakwichika mu pupiti; kupeenta pa bilungi byabo, kasa baji na mwekelo ya bupopweshi bwabo. Kya kwitutulako kyabaya bingi kipwilo kyo kyapichilemo.

¹⁶⁸ Inge anweba mukeba kuyuka, bulume bwa mu mapolitikisi, n’anyi kimye kijipo bumfumu bwa nkulo, mwamona kuji bayudeya. Talai kuji Bayudeya byo baji, mambo abo ke kyaalo. Inge anweba mubena kukeba kuyuka byaalo po byaimana, talai ba Yudeya.

Inge anweba mubena kukeba kuyuka kipwilo po kyaimena, talai ku banabakazhi. Talai byubilo byatama mukachi ka banabakazhi, mambo aye ye waimenako kipwilo. Uvwe anweba mwamona byubilo byatama mukachi ka banabakazhi, mukatana byubilo byatama mukachi ka kipwilo. Byoaikala aye, kasa wapenta-penta Yezebela, monka mwailatu biji kipwilo. Mwamona? Pano, akyo bo bukine, kabiji anweba mwayuka kyokyo. Mwamona? Inge anweba mubena kukeba kuyuka kipwilo po kiji, talai byubilo byatama mukachi ka banabakazhi benu. Mambo, aye ke, kipwilo ke mwanamukazhi.

Inge anweba mubena kukeba kuyuka malamuna a kyaalo, talai ku ba Yudeya.

¹⁶⁹ Monai, byonka byaambile Lesa kwi Balamu, panyuma ya kumvwa fukwiilo- yakine, Kyambo, “Kechi uye ne.” Ee, pano Aye wamubujile, panyuma Aye ya kumona mu muchima wanji—

mu muchima wanji, byo kyafwainwa kubiwa; Aye wamupele kyoaswisha Aye kyapamuchima wanji kyabula kulumbuluka, nanchi Aye waambile mba, “Yanga.”

¹⁷⁰ Kabiji anweba mwakonsha kuuba kintutu kimo. Inge kechi anweba mubena kukeba kwenda mu Bukine ne, mwakonsha kuya na—na kwikala na mwingilo wabaya bingi. Kyakine, wakonsha. Bino anweba mubena kusenda mwaila kyaswa muchima Wanji kyabula kulumbuluka. Anweba mubena kwendale peulu ya Kyambo Kyanji. Aye ukemunonkesha anweba, kyakinetu. Ke. . .

Nobe byonka byo Aubile kwi Balamu. Aye wajinga washukwa, bino aye kechi wakonsheshe kufinga bantu ne. Aye kechi wikyubile ne. Mambo, kimye kyonse kyo atatwile kufinga, aye wapesheshenga. Mwamona, aye kechi wikyubile ne. Bino uvwe aye waiya kubyabunoshi ne byakumwenamo, aye wabujile aba bantu, kupichila mwi Balaka, kulenga mambo abukende. Aye waletete kambi ya Isalela ne kwisongwasha, waambile mba, “Kika, atweba bonse twi umo. Kika, obewa wapopwejlenga Lesa umo. Atweba tuji na ngauzhi kuno, kabiji anweba muji na ngauzhi kokwa. Kabiji atweba tuji na milambo imo, aye Yehoba umo nobe byonka biji bashakulu betu. Pano, kika anweba bonse kyo mwabujila kwia na kwikala netu?”

Aye Baibolo waamba mba, “Kechi winungeko ku babula kwitabila ne. Kechi mwikase ku kikokoji nabo ne, nangwa pachechetu ne. Inge babula Kwikiketekela, fumaiko kwi abo.” Mwamona? “Lupukaimo, mwikale baabenamo,” byo byaamba Yehoba, “kabiji Amiwa nkemutambulwila.” Mwamona? “Kukwatako ku bintu bya bubi bwabo ne.” Abo ibyo. Abo kebubi bwabo kwimena Kyambo, kabiji ne bintu bya byobya, fumaiko kwi akyo. Kechi muteleke ku kyokyo ne.

¹⁷¹ Kabiji papo twatana kuuba mba Balamu waile konka kwa na kutatula kufunjisha bantu, kabiji wajinga na kilubo. Kabiji aye—aye wanyemejile mu jishinda ja kwa Balamu, mujishinda jo aubijilemo, kabiji ne kufunjisha Balaka, ne baana ba Isalela balengele bukende. Kabiji ne mwaalo wafikijile kyalo kya Isalela, bantu, kabiji masauzande bonse bafwile mujuba jimo.

Kabiji kimye kyo bajinga kokwa, kitapisho kya kwa Lesa, na kulomba, kwaishile mwanamulume mwina Isalela na mwanamukazhi mwina Mediani, mwana mukazhi wa kidinominesheni, kabiji aye waile mu tente. Kabiji mwana wa ñanga waileko konka, kabiji ne kutola jifumu ne kwibepaya bonse babiji. Kabiji akya kyafomwene bukaji bwakwa Lesa. Mwayuka mba akyo kyo Kinembelo. Abo ibyo nyi? Mwamona?

¹⁷² Bino kika kyamwekele? Balamu, aye wakyombeshele mukukokesha Isalela. Kana aye waubile byepi? Aye wakokeshe jibumba jabo. Lesa lekai aye aye ne kwibakokesha jibumba jabo, kabiji ne kulubankanya jibumba jonse.

Kabiji uvwe mafujisho amo atatula, abo kechi Baibolo wa Kiine ne, akyo ke kulubankanya jibumba jonsetu. Muntu umo waimana na mulanguluko wapusanako, nobe Kola, ne kwamba mba, “Kyawama, *akye, akya*, kabiji ne *kikwabo*, kabiji Amiwa njina mulanguluko wapusanako,” akyo kilubankanya jibumba jonsetu. Kabiji akyo kyokyauba kipwilo kyonsetu jibumba jaleelo. Akyo kijitu bulongotu.

¹⁷³ Kufujsha nobe aye byoaubile, kasa akokeshia jibumba jonse ja Kandeshi-beniya, akya kyambo kwikibwezha panshi. Byo bafikile ku Kadeshi-beniya, nanch, ipo pobebakokeshenga mujibumba. Abo babwelele jibiji. Abo baile byonkabya. . .

Vulukai, abo bajilenga kajo ka ba malaika. Bajinga na Kyambo kya Lesa, kila bufuku, kyasololwa. Kabiji bajilenga kajo. Abo batomene kufuma ku jibwe. Abo bonse baubile byonse, bamwenenga byakukumya. Abo batajilenga Mosesa, kabiji bamwene kyambo kyanji, bamwene bungauzhi bwanji, bintu byonse.

Kabiji abo pa kupezhako byo batelekele ku yiwe mufunjishi wabubela, waishile mukachi kabo ne kufunjisha kilubo, aye wakokeshe jibumba, kabiji nekumwenamo mukyokyo.

Aye wafwaijilwe kushimika bishimikwa bya milyoni-dolla. Aye wafwaijilwe kwikala na madinominesheni akatampe. Aye wafwaijilwe kubikapo masauzande a masauzande abimye, kabiji ne kuuba mingilo ikatampe, kabiji ne mingilo ya bulume, kabiji wajinga ngauzhi. Akyo kijitu bulongo, bino, kikulutu kechi kiji na Kyambo kya Lesa ne, obewa wafwainwa kufumako kwi akyo.

Lesa kechi upimpula milanguluko Yanji ne. Ikalai bulongo na Kyambo Kyanji, mambo akyo kyo kikafuma kumpelo, Kyambo, Kyambo pa Kyambo. “Yense wa kufumyako Kyambo kimo ku Kikye, nangwa kubikapo kyambo kimo ku Kikye!” Kyafwainwa kwikala, kyokya Kyambo.

¹⁷⁴ Pano telekai bulongo pano. Kimye Kyambo kyaishile kwesekwa, kimye abo kyobaile kokwa kabiji bamwene bikantampe byapusanako, kikantampe kyapusanako kyamwekele kwi abo, ku bena Amaleki kyajinga—kyajinga bimye bya teni sauzande kukila kipimokyabo. Baambile mba, “Twamwekelenga nobe batete. Ma fensi abo, nagwa mizhi yabo yavimbilwa kyakuba amba bakonsha ne kuzhokoloka lubilo na kalaki wa kwikyombesha, makalaki abiji, ajinga akosa nangwa kyakuba mba bailenga, nakuzhokoloka ku bibumba, mwamona, mumizhi yabo. Kika, mafumo abo yatwa, ayo yalepa. Kabiji abo ke bazama. Kika, atweba twamwekelenga nobe batete. Atweba kechi twakonsha kwikyuba ne.”

Kabiji bantu babiji baimene pa kyokya Kyambo, Kaleba ne Yoshiwa, baambile mba, “Pembelaiko mineti umo! Anweba bantu tuu milyoni zhindamaitu pa mineti umo.

Atweba twakonsha kwikyuba. Mwamona, atweba twakila mukwibashinda abo.”

Kika kyo baimenejilepo? Lesa waambile mba, “Amiwa nemupa anweba ntanda. Ke yenu.” Kabiji byobyoy baimenejilepo. Bino bantu besongwele, pakachi ka bintu bikwabo, kabiji ne misango yonse ya mafunjisho a bantu ne kisho mukachi kabo, Kabiji abo bakokelela, kukokelela-kokelela, kechi bayuka nejishinda mwakuyane kabiji nekyakubane, jakubwelelamo ne kabiji ne byakuba ne. Abyo ibyo. Kwayishile Kyambo mu lweseke.

¹⁷⁵ Bino nangwabyonkabyo, Aye watambwile lusa lwakuba kyokyo, swishai kyaswa muchima wenu, kyaswa muchima wenu kyabula kulumbuluka, kuyuka kyokyo . . . Kika kiji mumuchima obe, Aye wikiyuka.

Mwaamba mba, “Kyawama, Mulongo Branham, Amiwa nguba *kikananga-ne-kikananga*. Kechi kikatazha ne. Lesa upesha pajuba pajuba. Amiwa nyimba mu Mupashi. Amiwa nzha mu Mupashi. Ami . . .” Aye ukekiswisha. Yaingatatu kulutwe. Abyo ibyo. Pano kika kyo usakuuba?

¹⁷⁶ “Amiwa mwala tuputula, kabiji Amiwa nguba *kikye*. Kechi nkisakamikapo ne. Amiwa nayuka lwitabilo lwami luji mwi Kilishitu, kechi mubyobya Amiwa byo vwala ne.”

Bino, Baibolo waamba mba pajipo kintu kimo pa kikye. Mwamona? Kana anweba mukoba ka? Anweba mukalenga kyakwitutulamo, nobe Balamu byoaubile, kasa uji yense umo nangwa mukwabo wamukazhi ne. Kana anweba mukoba ka kuyewa nsongwakazhi wenu? Obewa ukekala na jibumba ja ba Rickettas, abyo kine ibyo, ke jibumbatu jaba Yezebeli bepeta-penta. Mwamona?

¹⁷⁷ Bino Lesa ukakupesha. “Kika, Aye upesha.” Amiwa kechi nashinauka kyokyo ne. Aye wapesheshe Balamu, ne aye pamo. Mwamona? Kyakine Aye ukeyyuba. Obewa ubena kwenda mukyaswisha Kwanji kechi kyalumbuluka ne, kechi kyaswa muchima Wanji kyalumbuluka ne. Lesa kechi upimpula milanguluko Yanji ne, mambo Aye ukupesha.

Aye wapesheshe Isalela ponkapa pa myaka foote. Kika kyobaubile abo? Bansogwele bakazhi babo, bakomeshe bisemi, bafyompele bana babo, bapaine byabujikumi, baikela bulongo. Kabiji Lesa wibapesheshe abo monka mukiselebwa mungyetu, wibajishishe abo na maana, ne bintu bikwabotu. Kabiji abo bonsetu baonaikile, mambo kechi balamine kintutulu Kyanji, kyabula kwitabilwa . . . Aye kintutulu kyaswa muchima, Aye Kyambo. Abo batolele Aye kyaswa muchima kyabulakulumbuluka.

¹⁷⁸ Yanga kulutwe, bino, anweba vulukai, byo bafumine pa Kadeshi, kechi baendele kuya kulutwe ne. Abo bazhokolokelengatu ne kuzhokolokatu, monka mukiselebwa

mungyetu. Kwepi, abo bafwaijilwe kwikala, mu moba abiji panyuma ya kyokyo, bafwaijilwe kwikala mu ntanda ya mulaye. Abo baendele myaka foote, kabiji bonsetu bafwile pakuuba Yoshua ne Kaleba, aba baikele pa Kyambo kitanshi.

¹⁷⁹ Anweba Lesa, tukwashai. Lesa kechi upimpula kyaswa muchima Wanji ne. Aye kechi upimpula milanguluko Yanji ne, bino Aye ukemupesha anweba.

Kiine, Aye wamupesheshe Balamu. Kabiji kika aye kyoabile panshi popa? Aye walubankenye jibumba jonsetu. Mwamona, anweba mwafwainwa kwikala pa byo Aabile. Aye kechi wakingishishe ntachikilo Yanji itanshi ne.

¹⁸⁰ Pano talai pa bena Balamu baleelo, mumwingilo wabo, kana anweba mwakonsha. Ingi talai kuzhokoloka. Kukwikala na bubile, kwamba mu njimi, kiine, kwingijisha kyabupe kya Lesa mukumwenamo, nebintu bikwabo, kiine. Bino akya kizhilulula kipwilo kyonse ne kuleta bubole kulufujisho. Abo kijitu bulongo.

Umo waabile kwi amiwa mba, waabile mba, “Kika kyo ubila *kikye*? Kika kyo ubena kuuba *byobya*?”

Amiwa naabile mba, “Kechi waketekela mba Abo bo Bukine ne?”

¹⁸¹ “Oo, ee. Bino,” aye waabile mba, “mwayuka kine kintu nyi? Ao kechi ke mwingilo obe ne. Obewa wafwainwa kulombelela bakolwa. Abo baketekela mba obewa wi ngauzhi. Kika, mwakonsha kwibafunjisha banabakazhi kwikala, kabiji abo banabalume, pakuuba mba bobo *kikye*, *kyokya*, ne *kikwabo*.”

“Wakonsha kwibafunjisha byepi aujembula kasa babula kuyuka ne ABC’s wabo? Uu? Uu? Wakonsha kwibafujisha byepi abo abo bintu byobabula ne kutolamo lubaji?” Mwamona? Atweba twafwainwa kubwela jibiji ne kutatula akwa ku ntendekelo, nangwa anweba pomwafumijilemo, ne kusenda Kyambo kya Lesa kyonsetu.

¹⁸² Ingi talaitu kubaji mu mwingilo leelo jino. Nobe byonka Balamu byo asongwele mu kipwilo kya Lesa, pite, wasongwele pite mu kipwilo kya Lesa, nanchi byo biji ne babo bafunjishi babubela leelo babena kweseka kwimubuula anweba. Abo babena kusongola kila byonse bya tubungwe kabiji ne bantu baji mubupite bwakala bwamu Lumwekesho 17. Lufunjisho lwabo lwa kwa Balamu lubena kuzhokoloka leelo, ne kwamba mba, “Atweba tujitu pamo. Atweba bonse twi Benakilishitu.” Ne bang’anga ne mapapa, kabiji ne bintu byonse, boonse kunekenya kabiji ne kuuba kikye.

¹⁸³ Aye musapwishi waabile mba...Nangwatu Amiwa nayuka ne musapwishi waki Pentekosito, bonsetu, batatwile kupana kuzhokoloka ku kwalumbuluka. Akyo kyalumbula mba, *Ashtoreth*, ke “lesa-wang’ondo,” ke walumbuluka mucheche.

Waambile, “Shinka meso obe ne kwikisenda, inge kisa kukozha milanguluko yabumuntu.” Shinka meso obe? Ke kuzhokoloka Wafer, kino kyalumbuluka ka? Atweba tubene kutwala mubiji walajika, Yesu Kilishitu, walajika; kechi kuzhokoloka ku lesa-wang’ondo, Ashtoreth, ao Maliya yeapikile pakifulo kyanji. Kabiji mwina Loma kosher ukijiponka, namambo akwa lesa-wang’ondo, bunkishi, kechi lesa. Atweba twakundaula kosher, kiine. Oo!

¹⁸⁴ Nanchi pano pite mukatampe wa mu Lumwekesho 17, abo bafunjishi ba Balamu na lufunjisho lwabo lwabubela, ubena kusongola kipwilo mumusango watama. Monai inge kyafika pa kimye kya kubekya, talai pa kunekena kwa kikye. Naini andulendi ne bintu bikwabo byapusanako tubungwe, kimo kibena kutwala lubaji lukwabo, ne kimo nakyo kukwabo. Kechi kujipo kukwatakana mukachi kabo ne. Kabiji abo babena kweseka kuleta kukwantakana; kechi kibena kutundaikwa na Kyambo kyakwa Lesa ne, muntachi muntutulu wakwa Lesa. Abo babena kusenda mwaila mapolitikisi ne tubungwe.

Lesa kechi upimpula milanguluko Yanji ne. Aye wikala bulongo na Kyambo Kyanji. Aye waambile mba, “Meulu ne ntanda bikapita, pakuuba Kyambo Kyami kechi kikapita ne.” Abyo ibyo. Aye wikala na Kyambo Kyanji kitutulu. Oo, amiwa!

¹⁸⁵ Nangwa bekilangulukila mukwikimena Akya, kijipamo nobe byo baubile, kabiji kijipamo... Kujitu kintu kimo kya kuuba. Aye kechi Ukekipimpulapo ne. Anweba ketekelaitu. Mambo, byonse meulu ne ntanda bikapita; Kyambo Kyanji kechi kikankakalwa ne. Mwamona?

¹⁸⁶ Anweba mwamona komubena kusongolwa nyi? Mwamona mapolitikisi ne bintu bikwabo, byo babena kweseka kwitunga ku kipwilo pamo na mapolitikisi mu kipwilo? Atweba kechi twanungakana ne Kilishitu kupichila mu mapolitikisi ne.

Atweba twanungakana na Kipwilo, kwi Kilishitu, kupichila mu lubatizhilo lwa Mupashi Wazhila. Kabiji jishinda jakuyukilamo lubatizhilo lwa Mupashi Wazhila, ke mambo akuuba mba Mupashi mwi obewa utuluka Kyambo kyonse kya Lesa kwikala kya Bukine. Abyo ibyo. “Pakuuba yense wa kufumyako Kyambo kimo ku Kikye, nangwa kubikapo kyambo kimo ku Kikye, lubaji lwanji lukafumishiwamo mu Buuku wa Bumi.”

¹⁸⁷ Nangwabyonkabyo, “Aye wibanonkesha,” anweba mwaamba mba. Anweba kechi muketekela ne Abwa bu nonsi ne. Anweba kechi mwakonsha kutuluka Lesa na bunoshi ne. Ntanda yinoka. Balamu wanonkele nayo.

Bino, mulongo, umuzhachisha Lesa na Kyambo Kyanji. Aye ulama Kyambo Kyanji kabiji ne Kwikimweshwa Bukine. Nanchi, vulukai, mulunda, kikulutu uji na bumi, kechi mulubeko kikye ne: Lesa kechi upimpula milanguluko Yanji ne. Nangwa

byonkabyo, Aye ukapesha. Aye ukakuleka kuya mukyaswa muchima wanji kyabula kulumbuluka, bino Aye kechi wakonsha kupimpula milanguluko Yanji ne. Aye kechi ukapimpula mutanchi Wanji ne. Aye kechi ukapimpula Kyambo Kyanji ne, kwi obewa. Ine, mwane.

Obewa wafwainwa kupimpulwa. Obewa kechi wakonsha kulengela Kyambo kya Lesa kuswana na byakupitamo kyobe ne; obewa wafwainwa kwikala nakyakupitamo kyaesakana na Kyambo kya Lesa. Mwamona? Ajo jo jishinda jo muji najo. . .

Mwaamba mba, “Kyawama, Amiwa ne muntu wawama. Lesa uba *kikye, kyokya*, nangwa *kikwabo*.” Bino ulama Kyambo Kyanji nyi? “Oo, kyawama, Amiwa nemubula, akyo kechi kijipo. . . Ine.” Kijitu bulongo, pajipo kintu kimo kyatama pantu pamo. Lesa ubena kuya. . . Ee, Aye ukakupa bubile. Kiine, Aye ukakulenga obewa. . .

¹⁸⁸ Awa dinominesheni ubena kunonka pakuba awa ujina kyo ufwakyo! Abo bakumbenye matente abo, nabintu bikantampe, byawama bipwilo, ne bintu bikwabo, muntanda monsetu. Abo banonka bingi, kabiji mali abena kwichika mukachi, kabiji bamembala kufuma konsetu kokwa nekokwa. Nanchi kechi Baibolo waambile mba, “Akwa kwatanwa bunosho bwavula bwantanda, ne mweo yabantu pamotu,” kabiji nebyonsetu, byataniwe mu yiwe pite wakala, ao ye inaja byonse, mapolitikisi ne kabungwe?

¹⁸⁹ Pakuuba jibumba jicheche ja Lesa ke Musongwa Wanji, jaimana pa kyokyo Kyambo. Lekai aye mutemwe Tata wa Mwiulu emulame anweba kasa mwaikajikwa bulongo. Kechi mwafwainwa kufuma ku kyokya Kyambo ne.

Anweba mwafwainwa kupesha, mwafwainwa. . . Lesa wakonsha kubuka bakolwa. Aye wakonsha kubuka mwaanenu wakolwa. Aye wakonsha kubuka balume bobo, bakazhi bobo. Aye wakonsha kubuka bainobe, ne muntu mukwabo. Anweba mwakonsha kukiluka na Mupashi Wanji, kabiji ne kuzha peulu-ne-panshi.

Vulukai, mvula unokela pa baoloka ne pa babula koloka, kijitu pamo. Bino uvwe awa lukunwa wabyalwa popa, kana waikajikwa nangwa kechi waikajikwa ne. Kabiji inge awa waikajikwa, wakonsha. . . Inge ke wichi, kyafwainwa kulupula musango umotu wa wichi. Inge kyo Kyambo kya Lesa, kyafwainwa kuleta Kyambo kya Lesa. Inge kechi kiji byobyoby ne, kyawama, nishi kechi byokiji ne. Mwamona? Mwikyumvwa nyi pano?

¹⁹⁰ Aye Nkambo emupeshe. Apo Amiwa nakwimubula anweba Amiwa nsakuleka pa naini koloko, kabiji apo po pano, mamiteti twenti kufika teni. Anweba bantu bavula, muji kwalesha kwakuya. Amiwa nemutemwa anweba. Kabiji ane mambo Amiwa akwimusungila nobe bibye anweba, kechi

namambo Amiwa nakeba kushinta kwi anweba ne, bino Amiwa nemutemwa anweba. Kabiji kyo Amiwa byo nayuka, kechi Amiwa nemufya nangwa kimo ne; Amiwa nemubula kya Bukine.

¹⁹¹ Amwa mu mbung,eno amo Amiwa mongya, kechi mukang'umvwapo kusapwila aye Mbila ne. Ine, Amiwa ne mulaile, kwiya ku ino tambanako. Ponkapano ipo Amiwa po sapwila Mbila yami. Amiwa njina fiili nangwa foolo akwabo kuno, ao Nkambo ye ampele amiwa, Amiwa njina Binembelo pa kikye, amba Amiwa kechi nakonsha kusampwila kuji konse ne kanatu ponkapano. Apano ipo Kyambo kya Lesa po kyatatwijile kuya. Kabiji, poso Lesa wikipimpula, Amiwa ngikala ponka pano ne kwikileta patoka pokapano. Abyo ibyo.

Amwa mu mpwijilo, Amiwa ndombelela bakolwa, ne bintu byonse byonkabya; kabiji, kuluba, waambile mba bintu byazhokoloka nobe byoby, amba mukoko wami uvwa. Abo bayuka akyo kyo mbeni kwambapo. Inge ne, ke kiteyo kya kukanda, mwamona. Amiwa namweshi biyukilo bya—bya kweseka kumweshi mba Lesa wayuka, mu kuyuka bapashi, kabiji wayuka michima ya bantu, ne kuuba bibye bintu. Abwa ke bupe bwakusapwila, ke kutundaikatu bantu.

Kintu kitanshi mwayukatu, tepu uponena pa nzubo yabo. Abyo byokiji, nanchi. Inge aye ye mukoko, aye ukeya nakyo. Inge aye ye mbuzhi, aye utayatu tepu. Uu-uu. [Mulongo Ben Bryant waamba mba, “Ne obewa, ne obewa pamotu.”—Waku.] Mwamona, akyo. . . “Kabiji anweba, ne anweba,” abyo ibyo, Ben. Akyo, abyo kine ibyo. Ben wajinga na kyakupitamo. Kijitu bulongo. Kyawama, abyo ibyo.

¹⁹² Bushe anweba kechi mwasekela mba muji Banji nenyi? Bushe kechi muji na lusekelo nenyi? Atweba twaimbanga lwimbo mucheche waki Pentekosito, pa kimye kyabaya, nobe:

Amiwa njibingi na lusekelo mambo Nkambo wandetele amiwa;
 Amiwa njibingi na lusekelo mambo Nkambo wandetele amiwa;
 Inge kechi kyajinga Yesu ne, Amiwa kwepi ko nakonsha kwikala?
 Amiwa njibingi na lusekelo mambo Nkambo wandetele amiwa.

Oo, Amiwa njibiji nalusekelo mambo Nkambo wandetele amiwa;
 Amiwa njibingi nalusekelo mambo Nkambo wandetele amiwa;
 Inge kechi kyajinga Yesu ne, Amiwa kwepi ko nakonsha kwikala?
 Amiwa njibingi na lusekelo mambo Nkambo wandetele amiwa.

Amiwa njibiji nakubijika mambo Nkambo
 wandetele amiwa;
 Amiwa njibijingi nakubijika mambo Nkambo
 wandetele amiwa;
 Inge kechi kyajinga Yesu ne, oo, kwepi ko
 Amiwa konakonsha kwikala?
 Amiwa njibingi na lusekelo mambo Nkambo
 wandetele amiwa.

Lukumo! Anweba kechi mwasekela nenyi?

Anweba kechi mwasekela ne . . .

Twayai tumwimbe.

Bushe anweba kechi mwasekela mba Nkambo
 wimufumishemo nenyi?
 Bushe anweba kechi mwasekela mba Nkambo
 wimufumyamo nenyi?
 Inge kechi kyajinga Yesu ne, oo, kwepi ko
 Amiwa konakonsha kwikala?
 Amiwa njibingi na lusekelo mambo Nkambo
 wandetele amiwa.
 Kyawama, Amiwa nabaimbenga mambo
 Nkambo wandetele amiwa;
 Amiwa nabaimbenga mambo Nkambo
 wandetele amiwa;
 Inge kechi kyajinga Yesu ne, oo, kwepi ko
 Amiwa konakonsha kwikala?
 Amiwa njibingi na lusekelo mambo Nkambo
 wandetele amiwa.

Bushe anweba kechi mwasekela pa kikye nenyi? Nanchi
Tukenda Mu Kyeya. Anweba mwayuka yewa lwimbo?

Atweba tukenda mu Kyeya, Ke Kyeya
 kyawama,
 Kiyatu paji miso ya kime kya lusa lwa saama;
 Samai konse konse mwi atweba mu mute kabiji
 ne mu bufuku,
 Oo, Yesu, Kyeya kya pano pantanda.

Kechi mwikitemwa kyo nenyi? Twayai tumwimbe ne
 jikwabo.

Atweba tukenda mu Kyeya, Ke Kyeya
 kyawama,
 Kiyatu paji miso ya kime kya lusa lwa saama;
 Samai konse konse mwi atweba mu mute kabiji
 ne mu bufuku,
 Oo, Yesu, Kyeya kya pano pantanda.

Ki samapo!

Anweba bonse bazhijikwa ba Kyeya ambai,
 Yesu, ke Kyeya kya pano pantanda;

Bukine ne lusa mu Jizhina Janji,
Yesu, ye Kyeya kya . . .

Pano twayai tusutule maboko etu inge tubena kwimba.

Oo, atweba tukenda mu kikyeye Kyeya, Ke Kyeya
kyawama,
Kiyatu paji miso ya kime kya lusa lwa lukumo;
Samai konse konse mwi atweba mu mute kabiji
ne mu bufuku,
Yesu, ke Kyeya kya pano pantanda.

Imunai mu maboko umo ne mukwabo.

Oo, Kiyatu paji miso ya kime kya lusa lwa
lukumo.

Bushe kechi mwasekela anweba mba mwi baana ba Kyeya
nenyi? Aye Mwaana ukeya.

. . . byonsetu bituzhokoloka atweba mu mute
ne bufuku,

“Baana babacheche, itemwai umo ne mukwabo.”

Oo, tukenda mu Kyeya, Ke kintu kyawama
bingi . . . (Kusololwa kwa Kyambo Kyanji.)
Kiyatu paji miso ya kime kya lusa lwa lukumo,
Samai konse konse mwi atweba mu mute kabiji
ne mu bufuku,
Ke Yesu, Kyeya kya Kyambo.

Anweba bonse mwaketelai nyi?

Atweba tubena kuya ku Ziona,
Awa wawama, wawama Ziona;
Atweba tubena kufoola kuya ku Ziona,
Awa Muzhi wawama wakwa Lesa.

Oo, atweba tubena kuya ku Ziona,

Lekai aba bakana kwimba
Ao wabujile kuyuka Lesa wetu;
Pakuuba baana ba Mfumu wa Mwiulu,
Ne baana ba Mfumu wa Mwiulu,
Kabiji lekai ng'ambe lusekelo lwabo,
Lekai ng'ambe lusekelo lwabo.

Mambo atweba tubena kufoola . . . (Lukumo!)

Awa wawama, wawama Ziona;
Oo, atweba tubena kufoola kuya ku Ziona,
Awa Muzhi wawama wakwa Lesa.

Oo, atweba tubena kuya ku Ziona,
Oo, wawama, wawama Ziona;
Atweba tubena kufoola kuya ku Ziona,
Awa Muzhi wawama wakwa Lesa.

193 Tolai tutambala twenu. Sendai tutambala twenu, kakimye
kachechetu. Twaya tu pepezheko maboko etu amulambu. Kechi

kyajinga kikuta ne, pakuuba basendele kufuma ku mubiji wakwa Paulo tutambala ne bintutu bikwabo, mwamona.

Oo, atweba tubena kuya ku Ziona,
Oo, wawama, wawama Ziona;
Atweba tubena kufoola kuya ku Ziona,
Awa Muzhi wawama wakwa Lesa.

Oo, atweba tubena kuya ku Ziona,
Oo, wawama, wawama Ziona;
Atweba tubena kufoola kuya ku Ziona,
Awa Muzhi wawama wakwa Lesa.

¹⁹⁴ Amena! Oo, kechi kyakonsha kukulengela kumvwa bulongo nenyi? Amiwa mbena kulanguluka abo bazhijikwa bakala kunyuma, kasa bakyangye kutwela mumafujisho aki Loma, kasa benda mututumbatumba, mwayukatu, ku mukolobozhi mucheche, kasa abena kuya ku jiyengo ja mabokwe, na kwamba mba:

Oo, atweba tubena kuya ku Ziona,
Awe wawama, wawama Ziona;
Atweba tubena kufoola kuya ku Ziona,
Awa Muzhi wawama wakwa Lesa.

Aa majimi amu Ziona ayula
Ke masauzande abya zhila byatobala
Kasa atweba tukyanyge kufika ku Jitanda ja
Mwiulu ne,
Kasa atweba tukyanyge kufika ku Jitanda ja
Mwiulu ne,
Nangwa kwenda mu mikwakwa ya golonde,
Nangwa kwenda mu mikwakwa ya golonde.

Atweba tubena kuya ku Ziona,
Ke wawama, wawama Ziona;
Atweba tubena kufoola kuya ku Ziona,
Awa Muzhi wawama wakwa Lesa.

¹⁹⁵ Mpitulukai panyuma yami:

Nkambo Lesa, Amiwa nechipa Amiwa mwine kipya kwi Anweba. Ntokeshai kufuma ku bumbulwa koloka bonse. Ntokeshai kufuma ku luzhinauko lonse mu Kyambo Kyenu. Lekai amiwa, kufuma kuluno Lusanguko, ngikale ke kilengwa kipya mwi Kilishitu Yesu. Lekai amiwa ngikale, mu muchima wami, na Kyambo Kyenu. Lekai Akya kikale Lampi wakumaulu ami ubena kusama mumukwakwa. Kufuma pa kino kimye Amiwa nkemulondela Anweba. Mu Jizhina ja Yesu. Amena.

Atweba tubena kuya ku Ziona,
Oo, wawama, wawama Ziona;
Atweba tubena kufoola kuya ku Ziona,
Awa Muzhi wawama wakwa Lesa.

¹⁹⁶ Bushe kyokyo kuuba kyakulengela kumvwa bulongo nenyi? Atweba twasashijila atweba bene kipya, byo twayuka mba mu michima yetu twasangulwa kufuma ku bafu, twalengwa na bumi. Bushe kechi kyakonsha kukulengela kumvwa bulongo nenyi? Ami, oo, ami! Amiwa nemutemwa anweba, na butemwe bubula kufwa.

Telekai. "Itemwai anweba bene na bene. Mambo kechi mwakonsha kushikwa mulongo wenu ne, Ao ye mumona, ne kwamba mba mwamutemwa Lesa, Ao ye mwabula kumonapo." Mwamona? Nanchi itemwaitu umo ne mukwabo.

Nanchi, mwingijile umo ne mukwabo, mwingijila Lesa. Abo ibyo nyi? "Monka mo mwaubila ku umo wababo babena kusangulula Bulume mwi abo, mo mwaubila Amiwa."

"Kimye ka atweba kyo twamwene Anweba kukeba kintu? Kimye ka atweba kyo twimupempwile Anweba mu kaleya? Kimye ka atweba kyo twaubile bibye bintu?"

"Abya byomuba kwi abo, anweba mwibyuba kwi Amiwa."

¹⁹⁷ Bushe akyo kechi kyawama nenyi? Amiwa namutemwa Aye, kechi ibyo nyi?

¹⁹⁸ Oo, kujipo lwimbo umo mukwabo ye twafwainwa kwimba, inge mwaikala na kimye kyabayako. Oo, kyawama, tusa kwibaletatu. Kijitu bulongo. Kijitu bulongo, mwane. Oo! *Yanga Najo Jizhina Ja Kwa Yesu*. Kechi mulubeko kyokyo ne, balunda. Twayai tumwimbe pano. Umo umo, pano, bonse pamo, na muchima umo wabaya, twikitola kwi Aye. Twayai, na byonse byo tuji nabyo mwi atweba.

Yanga Najo jizhina ja Yesu,
Mwaana wabulanda ne wamalwa;
Jikakupa lusekelo ne lutekenesho,
Yanga Najo konse konse.

Jizhina Jawama, Byo jatobala!
Luketekelo lwa ntanda ne lusekelo lwa
Mwiulu;

Jizhina Jawama, Byo jatobala!
Luketekelo lwa ntanda ne lusekelo lwa
Mwiulu.

¹⁹⁹ Vulukai pano, ndombeshaipo amiwa kimye kuji mwela wakaba ubena kupupa, kimye diabola konse konse ubena kuleta byalweseko, Amiwa nkemuvuluka bufuku nangwa mba mute, kabiji Amiwa nkemulombelelanga.

Imanai ku kafunga wenu wawama, Mulongo Neville, kabiji ne wakibiji wanji, Mulongo Capps. Telekai kwi abo. Abo bakemufunjisha pa Kyambo kya Bumi. Amiwa naketekela kyokyo. Inge Amiwa kechi ne kiketekela ne, Amiwa kine kuuba naikala nabo kuno ne. Amiwa kine kechi nakonsha kwikyuba ne. Amiwa naketekela mba baketekela Mbila, kabiji baikala nakyo

mwaila buyuke bwa maana abo, kabiji Amiwa njina lwitabilo mu bantu bonse babiji. Ikalaitu nabo. Abo balongo bakwabo, konse kobajinga na mbung'eno yabo, aba bakwimana bufuku kuno, inge mwikala kinkalankulo nabo, immanai nabo. Anweba mwakumvwa biine bintu byobakwishila kuno, bufuku buno.

Yanga Najo jizhina ja Yesu,
Jikakupokolola ku byonse; (Telekai ku kikye.)
Umwwe meseko akuzhokoloka,
Kejipemetu aja Jizhina Jazhila mu milombelo.
Jizhina Jawama, (Jizhina Jawama!) O byo
jatobala! (O byo jatobala!)
Luketekelo lwa. . .

Lesu Mutemwe, bukai babo bantu. Ne mulomba Anweba, Taata, mu Jizhina ja Yesu. Kiswishai kye, Nkambo, Nalomba.

. . . O byo jatobala!
Luketekelo lwa ntanda ne lusekelo lwa
Mwiulu.

Poso byo tukakumana! poso byo tukakumana!
Poso byo tukakumana kumaulu akwa Yesu;
Poso byo tukakumana! poso byo tukakumana!
Lesu ekale ne anweba poso byo tukakumana
jibiji.


Twayai pano tukunyike mitwe yetu.

[Mulongo Branham wanyinyita *Lesu Ekale Ne Anweba*—Waku.] Anweba Lesu, ekale ne atweba. Tukwashai, Nkambo.

. . . byo tukakumana kumaulu akwa Yesu!
(Poso byo tukakumana!)
Poso byo tukakumana! poso byo tukakumana!
Lesu ekale ne anweba poso byo tukakumana
jibiji.

²⁰⁰ Ayo yo milombelo yami ya kine. Poso twakumana jibiji, Lesu emupeshe! Kabiji pano Amiwa nsakwipuzha Mulongo Neville wetu wawama inge wakonsha kupalang'anya kino kipwilo kyawama.

Lesu wimutemwa anweba, umo umo. Amiwa nasanta bingi pa kwikala na bantu baji nobe anweba. Mbila yami ikekala byepi inge kechi Amiwa najinga na muntu nangwa umo wiyiketetejile? Kabiji muji bantu muno, mwafwainwa kufwila Kyokya, mambo ino Mbila yo tuji nayo. Aye Lesu emukwashe, pa umo umo. Milombelo yami iji pamo ne anweba. Mapesho ami ayengatu na anweba bonse. Kechi mulubako ne amba obewa wi lubaji lwa lusanguko. Abwa Bulume bwakusangulula buji mwi obewa ponkapano. Byonse byapwa. Obewa wi mwaana wakwa Lesu.

Twayai tukunyike mitwe yetu, poso Mulongo Neville usa kupalang'anya. Kabiji Lesu emupeshe. 

65-0418E Kana Lesa Wakyalulapo
Milanguluko Yanji Pa Kyambo Kyanji?
Branham Tabernacle
Jeffersonville, Indiana U.S.A.

KAONDE

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org